

# ALAGA O LE TOE FUATAIGA

Tusitusiga Lautele a le Faagaioiga Toe Fuata'i Aso Lona Fitu o le Toe Afio Mai 2006 Vaiaso o Talosaga

- 1. Faatonu** - O le Galuega a le Atua e faia i le Auala a le Atua mo le Viiga o le Atua
- 2. O Le Faaola Alofa Mutimutivale** - A'o le'i mafai ona tatou fesoasoani i isi, tatou te manaomia e i tatou lava le fesoasoani e na o Keriso lava e mafai ona Ia foai mai.
- 3. Molimau I Tuaoi** - E faapefea ona tatou faafiafiaina o tatou tuaoi?
- 4. Fesoasoani I Le Aiga Tagata Puapuagatia** - O puapuaga o le lalolagi o le a na ona faatupulaia lava. O le a se mea e mafai ona tatou faia ina ia tatou fesoasoani ai?
- 5. Alofa Mutimutivale Ua Faatinoina** – O le alofa mutimutivale na te sailia auala e faamāmāina ai puapuaga o isi.
- 6. “O Sē E Aupito Itiiti O I Latou Nei”** – O tagata e masani lava ona tatou lē amanaia e taua tele i latou i le silafaga a le Atua.
- 7. A'apa Atu I Ē e Lē Mafai Ona Aapa Atu i Ai** – O le feau a agelu e to'atolu e tatau ona alu manino lava i le lalolagi atoa.
- 8. O le taamilosaga a le Faamanuiaga – O aoga moni ea taumafaiga faamisionare? Ioe, e matuā aoga moni lava!**
- 9. Aumaia i le Faatinoina** – E ao ona tulai manino a'e tagata o le Atua ia matuā eseese lava ma le loto faapito o le lalolagi.

## *O le* Alaga o le Toe Fuataiga

Tusitusiga Aloa'ia Lautele Faale-Ekalesia a le Faagaioiga Toe Fuata'i Aso Lona Fitu o le Toe Afio Mai

**“O le tupulaga o loo tatou ola ai nei, ua manaomia ai gaioiga Toe Fuata'i.” – Testimonies, vol. 4, p. 488.**

## *Faa-Kerisiano Faatinoina*

I lenei Vaiaso o Talosaga, o le a suesueina ai e le au talitonu uma i le lalolagi atoa se mataupu sili ona taua: *Faa-Kerisiano Faatinoina* – o le a lea mea? I se faamatalaga faigofie, o a’oa’oga ia ma le olaga o Keriso ua faatinoina. O le a’oa’oga, e foliga mai e faigofie, ae e matua seāseā faatinoina! O Ekalesia, Tusi Paia, ma tagata o loo fai mai o i latou o Kerisiano, e mafai ona maua i le tele o vaega o le lalolagi. Ae e to’a fia tagata o loo latou faatinoina moni a’oa’oga uma lava a Keriso? E ese la le tele o lu’i ma tapulaa sili atu ona maualuluga faaleagaga o loo totoe i o tatou luma o ē o loo tauaveina le igoa “Kerisiano”!

“O le galuega a Kerisiano taitasi uma lava, o le faailoaina atu lea o Keriso, ina ia lafoia atu le malamalama, ina ia siitiaina le tapulaa o le amio, ma upu ma aafiaga faapaiaina mo le Atua, ina ia una’iina ai tagata faatalale ma le faatautala ina ia manatunatu i le Atua ma le ola e faavavau. E mananao lava le lalolagi e lafoaia ma le fiafia le ola e faavavau mai i o latou manatunatuga, ae e lē mafai ona latou manumalo pe afai lava o loo i ai pea i latou o loo faailoaina atu Keriso i o latou olaga faatinoina.”<sup>1</sup>

E tatau ona tatou laugaina le tala lelei e faavavau i a tatou faatinoga, ma afai e mafai ai, tala’i e ala i le faaaogaina o upu.

“O le manatunatu ia Keriso, o le faatinoina o le faatuatua ia te Ia, o lo tatou mauaina o Lona alofa tunoa lavea’i ma ola ai mo i tatou lava, lea e agavaa ai i tatou ina ia tatou tuuina atu o Ia i le lalolagi. Afai ua tatou a’oa’o mai ia te Ia, o le a avea loa Iesu ma a tatou autu; o Lona alofa, o loo mū saesae i luga o fata o o tatou loto, o le a mauaina mai loto o tagata. O le a tuuina atu le upu moni, o le a lē tuuina atu e faapei o se manatu mate e lē o i ai se ola, ae o le a faailoaina atu e le mana o le Agaga.”<sup>2</sup>

O lenei la sini matagofie lava i o tatou mafaufau, o nei faitauga e tatau ona manatunatu faatasi i ai ma e ao foi ona faasoa atu i o tatou uso o loo nonofo i nofoaga mamao ese. O le **Sapati, Tesema 9**, ua vavaeseina lea e avea ma aso o **talosaga ma anapogi**. O le Ulua’i Aso, Tesema 10, o le a aoina ai se taulaga faapitoa e atia’eina ai vaega fou o galuega faamisionare i le lalolagi atoa.

Tau ina ia faaaogaina e le Alii lenei taimi paia ina ia faamalosi ai i tatou taitoatasi uma lava i tapulaa sili atu ona maualuga i auunaga faatinoina ma le loto atoa!

<sup>1</sup> *Selected Messages*, bk. 1, p. 132.

<sup>2</sup> *Testimonies*, vol. 5, p. 158.

# O le Galuega a le Atua e Faia i le Auala a le Atua mo le Vi'iga o le Atua

**O** se ulugalii sa asiasi i Asia sa lā vaia se tamā ma sona atalii o galulue i se fanua. Na tosoina e le toea'ina le masini poo le fausaga e suaina ai le eleele ae fesoasoani le tamaititi i le tosoina o lenei a'upega. "Ou te manatu e matuā matitiva lava i la'ua," o le tala lea a le tamaloa i le misionare sa avea ma o la ta'iala o ia foi sa faaliliu upu. "Ioe," o le tali lea a le misionare. "Ina ua fausia le falesa, sa lā mananao e foa'i mo le fausiaina o le falesa, ae sa leai se la tupe. Ona la faatauina atu loa lea o le la povi ma foai le tupe mo le falesa. A'o lenei la ua tosoina ai e i la'ua lava le fausaga e sua a'i le eleele." "O se taulagafofo moni lava lena" o le tala lea a le fafine ina ua mavae se taimi umi lava e aunoa ma se tali. Fai mai le tali a le misionare, "La te lē faaigoaina lena mea o se taulagafofo. Ua na ona lā faafetai lava ina ua i ai se lā povi e faatau. O le foai i le Atua e lē o se taulagafofo. O le tiute."

E i ai se faaupuga faapea i Initia, "Afa'i e te foa'iina atu se mea e te lē manaomia, e lē o se foa'i lena mea." E i ai foi se isi faaupuga i Saina, "O se pogaivi mo le ta'ifau e lē o se alofa lea. O le alofa, o le pogaivi lea e **faasoa faatasi** ma le ta'ifau, pe afai o loo ē fia ai e faapei lava o le ta'ifau." O nei faaupuga o loo faailoa mai ai le tapuaiga faatinoina lea sa a'oa'oina e Keriso i Lona olaga ma Ana a'oa'oga.

Ua faatonu mai Keriso ia i tatou ina ia tatou aapa atu i tagata ona a'oa'o lea o i latou i le alofa o le Atua. "E na o le auala lava a le Atua o le a foai mai ai le faamanuiaga moni lava i le mauaina o tagata. Na faatasi le Faaola ma tagata e faapei o se tasi na naunau mo lo latou lelei. Na Ia faailoa atu Lona alofa mutimutivale mo i latou, auauna atu i o latou manaoga, ma maua mai lo latou faatuatuaga. Ona Ia faatonu atu lea ia i latou, 'Mulimuli mai ia te A'u.'"<sup>1</sup>

O le a le auala a Keriso? Na Ia faamalieina manaoga o tagata ona latou mulimuli atu lea ia te Ia. O tala o loo mulimuli mai o nisi nei o faata'ita'iga e tele na tu'ua e Iesu mo i tatou.

O le Mataio e 20 o loo faamatala mai ai tagata tauaso. O a mea na latou manaomia? Sa latou mananao ina ia vaai! A'o le'i mafai ona latou vaai faaleagaga, sa latou mananao ina ia latou vaai faaletino. E le'i fetalai atu Iesu ia i latou ina ia "latou lē amanaia lenei manaoga." Ana Ia lē amanaia lenei manaoga, semanu ua latou faagaloina o Ia ma faaluina aso uma o o latou olaga e talia ai le lagona faanoanoa mo i latou lava. Atonu e lē o ia i tatou le ituaiga faatuatua e mafai ona faamaloloina ai se tagata tauaso, ae e mautinoa lava e mafai ona tatou faia auaunaga sili atu nai lo na o le tuuina atu o lagona alofa.

O le Ioane e 8 o loo faailoa mai ai se fafine na maua o faia le mulilua. Na ia manaomia le puipuiga, taliaina, ma le faamagaloga. E le'i mafai ona faailoa atu e Iesu ia te ia se ala sili atu ona lelei seivagana ua Ia maua mai lona faatuatuaga ma lona talitonuga ma lona alofa. E le'i valaauina i tatou e le Atua ina ia avea ma leoleo (policemen) a ia avea i tatou ma tagata e alolofa i tagata uma. E i ai le taimi e faaigoaina ai le agasala i lona igoa sa'o ae e faato'a faia lava ina ua uma ona alofa atu i le tagata agasala i le alofa e leai ni ona aiaiga ma sona tapulaa!

O le Ioane e 3 o loo faailoa mai ai le fetaia'iga a Nikotemo ma Iesu. O le a le mea na ia manaomia? Na ia manaomia se fautua faaleagaga, na ia manaomia se tasi e mafai ona tautala atu i lona loto, ina ia toe fanaufouina. Na tatalaina ma le faaeteete lava e Iesu lona mafaufau ma lona loto i le alofa, ma na Ia maua ai ina se isi Ona so'o.

O le Luka e 6 o loo faailoa mai ai se vaega o le au Faresaio. Sa latou manaomia ina ia latou vaai i o latou lava faanaunauga ina ia "sili atu ona paia nai lo oe." Na faailoa atu e Iesu nei mea e ala i le avea o Ia ma fesoasoani i le tagata sa gase lona lima. Sa latou faia le filifiliga o le fia tagata faamaualuga ina ia lē

mulimuli ai ia Iesu. O le toatele i le taimi lenei, a lu'iina loa ma fesiligia le latou pule poo o latou talitonuga faapelepele, e sili atu ia i latou lo latou mulimuli i le faalialiavale faamaualuga nai lo Iesu.

O le Mareko e 6 o loo faamatalaina mai ai le fafagaina o le to'a 5000. O le a le mea na latou manaomia? E faalagolago le tali i le fesiligia o le fesili. Muamua, sa latou mananao ina ia faalogo i a'oa'oga a Iesu. O le mafuaaga lena na ala ai ona latou i ai iina. Ae peitai a'o agai pea i luma le aso, na suia ai o latou manaoga. O lo latou manaoga mo a'oa'oga na suia i o latou manaoga mo le fia ai. Na faamalieina e Iesu lenei manaoga ina ia mafai ai ona Ia toe faamalieina lo latou manaoga mo Ana a'oa'oga. E suia manaoga o tagata. Tatou te manaomia ina ia faaauau pea ona faamalie nei manaoga ma faaauau ai pea lava ona tosina mai i latou ia Iesu.

Na a'oa'o e Iesu Ona so'o i lenei lava autu. "Soo se aai foi tou te ulufale atu i ai ... faamalolo i ē mama'i o loo i ai, ma faapea atu ia i latou, Ua latalata mai ia te outou le malō o le lagi" (Luka 10:8, 9).

Vaai i le fetalaiga a Iesu, "Faamalolo muamua, ona ta'u atu ai lea e faatatau i le Atua." Foa'i atu mea o loo latou manaomia ona faasoa atu lea ia i latou le tali i lo latou manaoga sili atu.

Ou te manatua upu a Matini Lutelu (Martin Luther), "Sa ou taumafai e taofia mea uma i o'u lima a ua leiloa uma, a'o mea uma ua ou tuuina atu i aao/lima o le Atua, o loo ia te a'u pea lava."

Fai lau galuega o le foai atu manū o ē ola ona ē iloa lea o le mea o loo alu agai i ai. E faamasino le Atua i mea o loo tatou foa'iina e ala i mea o loo tatou taofia.

*"E lē o le tele o mea e te faia i le miliona talā,*

*Pe afai e te maua oa.*

*Ae o a mea o loo ē faia i le taimi lenei*

*I talā ma sene e te maua?"*

O le Faa-Kerisiano Faatinoina o le mea lenei o loo manaomia e le lalolagi. "O le Faa-Kerisiano Faatinoina o le faaalua lea o le finagalo o le Atua i upu ma faatinoga." <sup>2</sup>

A iloa loa e tagata o i tatou o Kerisiano moni, afai latou te iloa tatou te alolofa moni lava, pe a tatou faamalieina o latou manaoga, na pau lava lena o le auala e mafai ai ona tatou valaauliaina mai i latou ia Iesu. O le auala la tatou te iloa ai nā manaoga, e tataua ona tatou iloa nā tagata. A faia le **galuega a le Atua i le Auala a le Atua mo le Viiga o le Atua**, o le a lē aunoa lava ma le **faamanuiaga a le Atua**.

## ***Siiataga***

1 *The Ministry of Healing*, p. 143

2 *The Upward Look*, p. 184.

# O le Faaola Alofa Mutimutivale

**“Ia outou o mai ia te A’u, outou uma o loo galulue ma mafatia i avega, o le a Ou foai atu ia te outou le malologa” (Mataio 11:28).**

TU’UFA’ATASIA MAI I TUSITUSIGA A ELLEN G. WHITE

## Na Te tauaveina a tatou avega ma a tatou agasala

Ua valaaulia mai e Iesu i latou uma e vaivai ina ia o mai ia te Ia mo le malologa: “Ia outou o mai ia te A’u, outou uma e galulue ma mafatia i avega, o le a Ou foai atu ia te outou le malologa. Ia outou amoina La’u amo, ma a’oa’o mai ia te A’u; auā o A’u Lē e agamalu ma loto maulalo, ona maua ai lea e outou o le malologa mo o outou agaga. Auā e faigofie La’u amo, o La’u avega foi e māmā ia” (Mataio 11:28-30).

O le toatele e faalogo i lenei valaaulia latou te faanaunau mo le malologa, ma latou savavali ai pea i ala gaoā, ma fusi mau a latou avega i o latou loto. E alofa Iesu ia i latou, ma naunau e tauave a latou avega ma tauave foi i latou i Ona aao malolosi o le alofa. Ua Ia valaaulia mai i latou ina ia tuu atu avega mamafa i Ona luga. O o outou popolega ma mea tou te lē o mautinoa, o loo outou lē maua ai le filemu ma le malologa, Na Te finagalo ina ia aveesea; ae e tatau ona outou o mai ia te Ia, ma ta’u atu ia te Ia faanoanoaga lilo o o outou loto. Ua Ia valaaulia mai lo outou talitonuga ma lo outou faatuatuaga e avea o se faamaoniga o lo outou alofa mo Ia. E sili atu ia Iesu le meaalofa a le loto agamalū ma le talitonu nai lo le tamaoaiga uma lava e mafai ona foai e oa uma lava. Ua Ia valaaulia mai e ala i Ana meafaigaluega, le meaalofa o outou tagata ola. Tau lava o lo outou o mai ia te Ia i le faigofie ma le tailtonu o le a sau ai se tamaititi i ona matua, ma o le a faaamaloloina oe mai i au avega e le pa’i faalelagi mai i Lona aao.



Aua ne’i galo ia i tatou o Keriso o Ia o le Ala, Upu Moni, ma le Ola. Ua valaaulia e le Faaola alofa mutimutivale tagata uma lava ina ia o mai ia te Ia. Ia tatou talitonu nei i upu a lo tatou Alii, ma aua le faafaigatāina le ala mo Ia. Aua tatou te faimalaga ma le muimui, ma masalosaloga, ma manatunatuga lē mautinoa, ma faitioga, i le ala sili ona taua ua folasia mo le au faaolaina a le Alii latou te savavali ai, e peisea’i ua faamalosia i tatou i se galuega lē lelei ma le faigata. O ala o Keriso o ala ia o le olaga fiafia, o Ona ala uma foi o le filemu lea. Afai ua tatou faia e i tatou lava ala gaoā mo o tatou vae, ma ua tatou tauaveina i luga ia i tatou avega mamafa o popolega i le faaputuina mo i tatou o oa i luga o le lalolagi lenei, ia tatou liliu nei, ma mulimuli i le ala ua saunia e Iesu mo i tatou.

Tatou te lē o naunau i taimi uma e tuuina atu a tatou avega ia Iesu. Tatou te sasa’aina atu o tatou faafitauli i taliga o tagata i nisi o taimi, ma ta’u atu o tatou mafatiaga ia i latou e lē mafai ona fesoasoani mai ia i tatou, ma tatou faatalalē ai i le faaali atu o mea uma ia Iesu, ina ia Ia suia ala faanoanoa i ala o le

olioli ma le filemu. O le alofa faafitia e le tagata o ia lava, o le alofa faasatauroina e le tagata o ia lava, e tuuina atu ai le viiga ma le manumalo i le satauro . . .

E matagofie Iesu. E tumu o Ia i le alofa, mutimutivale, ma le agalelei. Ua Ia ole mai ina ia avea o Ia ma a tatou uo, ina ia Ia savali faatasi ma i tatou i ala gaoā uma lava o le olaga. Ua Ia fetalai mai ia te oe, o A'u o le Alii lou Atua; savavali faatasi ma A'u, ona Ou faatumuina lea o lou ala i le malamalama . . .

O le valaaulia a Keriso mo i tatou uma o se valaau lea i se olaga o le filemu ma le malologa – o se olaga o le saolotoga ma le alofa, ma se tofi tamaoaiga i le ola e faavavau oi lumanai. Aisea la tatou te teena ai lana valaaulia ma teena Lona alofa? Afai tatou te filifili tatou te ola faatasi ma Keriso i tausaga e leai se mutaaga o le olaga e faavavau, aisea tatou te lē filifilia ai o Ia e avea ma a tatou uo silisili lava ma sili ona faamamaluina ma sili ona alofagia iinei? Ua valaau mai Keriso ia i tatou ina ia savavali faatasi ma Ia i lenei lalolagi i le ala o le usitai agamalu ma le talitonu, o le a mautinoa ai se olaga mamā, paia, ma le fiafia. O le fea o le a tatou filifilia? – o le saolotoga i totonu ia Keriso, poo le nofo pologa ma le pule malosi i le auaunaga a Satani? O lo tatou avanoa taua lo tatou maua o se savaliga filemu, vavalalata ma le fiafia ma Iesu i aso taitasi uma lava tatou te ola ai. Tatou te lē manaomia ina ia tatou popole poo folasia lenei ala o le saolotoga i faafitauli ma puapuaga. O le manumalo o le a tatou olioli ai o le a sili atu ona taua auā sa tatou faia taulagaofa ina ia maua ai. O le filemu e lē mafaamatalaina o le a manaomia ai ina ia tatou tau ma pule o le pouliuli, ma tauivi ma le malosi atoa e tetee ai i le loto faapito ma agasala oi totonu. O manumalo e maua i aso taitasi e ala i taumafaiga vilivilita'i ma le lē faavaivai i le amio lelei ma galuega lelei, o le a sili ona taua e ala ia Keriso o Lē na alofa mai ia i tatou, “o Lē na foaiina mai o Ia mo i tatou, ina ia Ia toe faatauina i tatou mai i agasala uma lava, ma faamamaina mo Ia se nuu faapitoa, e vilivilita'i i galuega lelei” (Tito 2:14). E ao ona tatou saili ina ia tatou maua le silisiliese o le matagofie o Keriso. I le lotolotoi o faaososoga e ao ona tatou a'oa'oina i tatou i le tumau mausali lea o le a lē osofia ai se manatu muimui lava e tasi, e ui lava ina atonu o le a tatou mafatia i galuega faigata, ma le tauina o le taua lelei o le faatuatua.

Faafetai i le Atua ua pasia e nisi puapuaga ma a latou moli e lē'i mate. O loo matua malolosi o latou faamoemoe ma lo latou faatuatua, auā na maua mai ona o faafitauli ma faamalosi e puapuaga. Ana leai nei toa o le faatuatua, o ē na a'oa'o ina ia onosa'i ma tumau, ma puapuagatia ma faamalolosi, semanu o le a matuā faavaivaia moni lava i faafitauli o loo tulai mai. E faapefea ona mafai ona alofa atu se tasi o i tatou i ē o faanoanoa, i ē o puapuagatia, ma ē o mafatia, ma avea ma fesoasoani ia i latou i o latou manaoga, pe afai tatou te le'i o'o lava i nei tofotofoga faapenei? E lē mafai ona tatou faatāuina lo tatou Faaola i le lagona silisili ona maualuga seivagana ua mafai ona tatou vaai ia te Ia e ala i mata o le faatuatua o aapa ifo i le maualalo sili ona loloto o le malaia faale-tagata, aveina ai mo Ia le natura o le tagata, o le natura e puapuagatia ai, ma o Lona puapuagatia na Ia tuuina atu ai Lona mana faalelagi ina ia lavea'i ma siitia a'e ai tagata agasala i le mafutaga ma Ia. Oka, aisea ua matuā laititi tele ai lo tatou iloina o le agasala? Aisea ua laititi tele ai lo tatou salamo? Ona tatou te lē o faalatalata mai i le satauro o Keriso. Ua fa'ama'a'aina le malamalamaaga o le mafaufau ona o le taufaasese tele o le agasala, ona o lo tatou taumamao pea mai ia Keriso. Manatunatu i le Kapeteni o lou faaolataga. Na faamāina o Ia mo i tatou ina ia lē faamaina pe faalumaina i tatou e faavavau. Na ia puapuagatia i luga o le stauro, ina ia foa'iina mai ai le alofa tunoa i le tagata pa'ū. Ua faatumauina le faamasinoga tonu a le Atua, ma ua faamagaloina le tagata agasala. Ua maliu Iesu ina ia ola ai le tagata agasala. Ua tauaveina le mā e le Alo o Lē e Silisiliese mo tagata agasala, ina ia toe faatauina mai ai i latou ma faapaleina ai i latou i le mamalu e faavavau.

Ua matuā ole mai lava ma le mana le satauro o Kalevario, ma ua augā tatau ai ona tatou alolofa i le Atua i le taimi lenei, ma le mafuaaga e tatau ai ona tatou faamuamuaina o Ia, ma faasilisiliina o Ia, i mea uma lava. E ao ona tatou tauaveina lo tatou avanoa fetai i le salamo agamalu lava ma le salamo i vae o le satauro. E mafai ona tatou a'oa'oina lesona o le agamalu ma le maualalo o le mafaufau a'o tatou o a'e i luga o le Mauga o Kalevario, ma o lo tatou vaai atu i luga o le satauro, tatou te iloa atu ai lo tatou Faaola i Ona tiga, tatou te iloa atu ai le Alo o le Atua o maliu, o Lē amiotonu mo ē amiolētonu. Vaavaai ia te Ia o Lē e mafai ona aumaia i le upu e tasi agelu e lē mafaitaulia ina ia fesoasoani ia te Ia, a ua avea o Ia ma mea ula

ma faatauemuga, ma faifaiga inosia ma le ita. Ua Ia tuuina atu Ia lava o se taulaga mo le agasala. Ina ua faifai mai tagata ia te Ia, Na Te le'i faamata'u atu; ina ua tu'ua'iseseina o Ia, na Te le'i tautala atu i se upu. Ua Ia tatalo i luga o Lona satauro mo i latou na fasiotia o Ia. O loo Ia maliu mo i latou. O loo Ia tofogiina se tau e lē mafuatia mo i latou taitasi uma lava. Na Te lē manao e leiloa se tasi lava o i latou ua Ia faatauina i se tau taugatā tele. Ua Ia foa'iina atu o Ia lava ina ia taia, ma sasaina, e aunoa ma se muimui. Ma o lenei pagota lē muimui, o le Alo lea o le Atua. O Lona nofoalii e mai le vavau, o le a leai foi se i'uga o Lona malo.

O mai ia, outou o loo sailia o outou lava fiafiaga i olioliga faasāina ma tuinanauga agasala, outou o loo salalau ese mai ia Keriso. Vaai, se vaai i luga o le satauro o Kalevario; vaai i le pagota faatupu o loo puapuaga mo outou, ma ia outou popoto ai manū o outou maua le avanoa, ma saili nei le vaipuna o le ola ma le fiafia moni. O mai, outou o loo faitio ma muimui i mea faigata laiti ma tofotofoga laiti e tatau ona outou tauaveina i lenei olaga. Vaai ia Iesu, le amataga ma Lē na te faai'uina lo outou faatuatua. Ua Ia liliu mai i Lona nofoalii faatupu, Lana puleaga maualuga, ma tuu ese Lona ofu faatupu, ma faaofuina Lona itu Atua i le tino tagata. Na mativa o Ia mo i tatou, ina ia faatamaoigaina ai i tatou e ala i Lona mativa.

Na teena ma inosia le Alo o le Atua mo i tatou. E mafai ea la ona e faamatalaina lau tala o puapuaga ma ou tofotofoga, e ui lava ina ua ē iloa atoa atu lava le ata o puapuaga o le satauro, ma vaavaai atu ai e ala i mata o le faatuatua i puapuaga o Keriso? E mafai ea ona ē teufatuina le tauimasui i ou fili i lou loto a'o faalogoina le tatalo a Keriso mai i Ona laugutu gatete mo ē na tauemu mai ma fasiotia o Ia – “Lo'u Tama e, faamagalo atu ia i latou; auā ua latou lē iloa le mea ua latou faia?” (Luka 23:34).

O loo i o tatou luma se galuega ina ia faatoilaloina le faamaualuga ma le faalialiavale, lea o loo sailia se nofoaga i totonu o o tatou loto, ma ia aumaia i tatou e ala i le salamo ma le faatuatua i se mafutaga paia mafana ma Iesu Keriso. E lē tatau ona tatou fefefe pe mamā mai i le loloto o le faalumaina na gaua'i atu i ai le Alo o le Atua ina ia toe siitia a'e ai i tatou mai i le malaia ma le nofo pologa o le agasala i se nofoaga i Lona itu taumatau.

*O lo tatou avanoa sili ona taua lo tatou maua o se savaliga filemu, vavalalata, ma le fiafia ma Iesu i aso taitasi uma lava tatou te ola ai.*

E ao ona tatou faafitia i tatou, ma tau pea le taua tetee atu i le faalialiavale faamaualuga. E ao ona tatou faalafiina i tatou i totonu o Iesu Keriso, ma ia vaaia lava o Ia i a tatou talanoaga ma amioga o Ia lea e atoatoa Lona matagofie, ma e sili i le sefulu o afe. O o tatou olaga, o o tatou uiga vaaia, o le a molimau i le maualuga o lo tatou faatauaina o Keriso, ma le faaolataga na Ia galuea'iina mo i tatou i se tau taugata lava ia te Ia. A'o tatou vaavaai la ia te Ia i taimi uma, o Lē ua tu'ia e a tatou agasala, ma ua faapuapuagaina e o tatou faanoanoaga, e ao ai ona tatou maua le malosia ina ia faapei o Ia. E ao ai ona tatou fusia atu i tatou i le usitai naunau ma le fiafia ia Iesu Keriso. Ua matua o'o lava i le taimi ua tatau ai ona tatou ofoina atu nai itula taua o loo totoe o lo tatou taimi o le nofovaavaaia i le fufuluina o o tatou ofu o a tatou amioga, ma faapa'epa'eina i le toto o le Tama'i Mamoe, ina ia aveia i tatou ma sini o lena motu o tagata ofu-papa'e o le a tutū faataali'oli'o i le nofoalii tele pa'epa'e. <sup>1</sup>

### **Na Te malamalama i o tatou vaivaiga**

O oe ea o sē e faia mea sese? Alu ia Iesu, ma ole atu ia te Ia ina ia faamagalo oe, ona ē talitonu lea ua Ia faamagaloina oe. “Afa'i tatou te fa'aali a tatou agasala, e faamaoni o Ia ma amiotonu e faamagalo ai ia i tatou mai i a tatou agasala, ma faamamā mai ia i tatou i amioletonu uma lava” (1 Ioane 1:9). Ole i le Alii ina ia faamagalo ou sese. Ona ē olioli lea ia te Ia.

O le a leai ma se fesoasoani itiiti ia te oe ona o lou faanoanoa pea i ou sese ma ou vaivaiga. Ia ē faapea, “Le Alii e, ou te lafoa'i atu lo'u nei agaga leai se fesoasoani ia te Oe, ma ua na o Oe lava. O le a ou lē popole, auā ua uma ona E fetalai mai, ‘Ole mai, ona ē maua ai lea’ (Ioane 16:24).” Talitonu ua ē

maua. Talitonu e tumu lou Faaola i le alofa mutimutivale, e tumu i le alofa ma le naunau. Aua le faapopoleina oe e faafitauli laiti. O mea sese laiti atonu e faatagaina e le Alii ina ia lavea'i ai oe mai i mea sese tetele.

Fai lau vaega i le fesoasoani ia te oe lava, e faapei ona tatau ona faia e i latou uma lava o le a faamanuiaina. Talitonu o loo fesoasoani mai Keriso ia te oe. Ia ē musu e tautala i se upu o le lē talitonu. A fai atu le fili ia te oe ua lafoa'iina oe e le Alii, fai i ai o loo ē iloa e le'i lafoa'iina oe e Ieova, auā ua Ia fetalai mai, “Ou te le'i sau e valaau i ē amiotonu, a ua Ou sau e valaau i ē agasala ina ia latou salamo” (Mataio 9:13).<sup>2</sup>

Lo'u tuagane e, lo'u uso e, gaua'i atu nei lou mafaufau atoa ma lou agaga atoa ma lou tino atoa i le Alii. Malolo atu i aao o lou Faaola alofa. **E te lē manaomia ina ia ē faataalise atu i'i ma 'ō ina ia maua mai ai le malologa mai i tagata . . .**

O loo ia te oe se taua e ao ona tauina, ma e faapena foi i tatou uma lava. E mafai ona sili atu ona tatou faafaigataina lenei taua e ala i le liliu ese mai ia Keriso ma le amoina o le amo ua Ia ole mai ia i tatou taitasi uma lava ina ia tatou amoina. Na Te lē o ta'uina mai ea ia i tatou le mea moni ina ua *Ia fetalai mai, “O La'u amo e māmā ia”?* Afai tatou te fafauina amo mo i tatou lava, e faapei ona faia e le toatele, o le a tatou iloa le matuā mamafatū o nei amo; ae afai tatou te amoina le amo ua uma ona saunia e Keriso mo i tatou, ma tatou agamalu ma maulalo ai o tatou loto, o le a natia loa i tatou faatasi ma Keriso i le Atua. O le tulaga sa'o lea mo i tatou e tatau ona tatou i ai.

O se so'o o Keriso na te lē faapotopotoina mai avega ma matafaioi e lē mafai ona ia tauaveina – avega e mafatia ai malosi o le ola, ma lē maua ai se mapusaga. E le'i tuuina mai e Keriso ia i tatou se galuega faapea tatou te faia. E ao ona tatou taliaina o Ia, talitonu ia te Ia, ma faaali atu Lana amio, ma faailoa e ala i o tatou olaga fa'ale-tapuaiga ua tatou fanau mai i le Atua. Ona fialoa lea o o tatou loto, ua tatou toe fanaufouina, “e lē o le toto, e lē o le loto foi o le tino, e lē o le loto o le tagata, ae o le finagalo o le Atua” (Ioane 1:13). O le mana/malosi e sau ia i tatou e ala i lo tatou taliaina o Iesu Keriso.<sup>3</sup>

O lagona e lē o se tulaga saogalemu lea. E lē tatau ona tatou vaavaai i o tatou lagona i totonu mo faamaoniga o le taliaina o i tatou e le Atua. O le a leai se mea tatou te maua ai iina ae o le a na ona tatou maua ai o lagona ma mea o le a faavaivaia ai i tatou. Na pau lava lo tatou faamoemoe o lo tatou “vaavaai lea ia Iesu o Ia o le Amataga ma Lē na te faai'uina lo tatou faatuatua” (Eperu 12:2). O loo i totonu ia te Ia mea uma lava e osofia ai i le faamoemoe, i le faatuatua, ma le loto tele. O Ia o la tatou amiotonu, o lo tatou faamafanafana ma lo tatou olioliga.

O i latou e vaavaai i totonu o o latou lagona mo le faamafanafanaga o le a faavaivai ma faanoanoa. O se lagona o lo tatou vaivai ma lo tatou lē aoga e ao ona ta'ita'ia ai i tatou i le loto maulalo ina ia tatou ole atu i le taulaga toggiola a Keriso. A'o tatou faalagolago atu i Lona toto ma Lana amiotonu o le a tatou maua ai le malologa ma le filemu ma le olioli. Na Te lavea'iina i latou uma lava e o mai i le Atua e ala atu ia te Ia.

Tatou te manaomia ina tatou talitonu ia Iesu i aso taitasi, i itula taitasi. Ua Ia folafola mai e faapei o lo tatou aso, o le a faapena foi lo tatou malosi. O lona alofa tunoa o le a mafai ona tatou tauaveina ai avega uma lava o le taimi nei ma faatinoina ai ona tiute . . .

E ao lava ona tatou sailia le Atua i le aso lenei ma ia tatou finafinai lava o le a lē faamalieina i tatou e aunoa ma Lona faatasi mai. E tatau ona tatou mataala ma galue ma tatalo e peisea'i o le toe aso mulimuli lava lenei ua tuuina mai ia i tatou.<sup>4</sup>

### **Na Te foi mai ia i tatou le alofa mutimutivale mo isi**

A'o tatou le'i faamaoni i poloaiga a le Atua, Na Te le'i tuua i tatou e aunoa ma se faamoemoe, ma inosia ai i tatou i lo tatou vaivai ma lo tatou pa'ū maulalo i le agasala. E na o tagata lava latou te faia lenei mea – i latou e lē o liua ma lē o faamalūlūina o latou loto e le alofa o le Atua.<sup>5</sup>

O loo tatou i totonu o se lalolagi o le agasala ma faaososoga; o loo siomia i tatou e agaga o loo fano e aunoa ma Keriso, ma e finagalo le Atua ina ia tatou galulue mo i latou i auala uma lava tatou te mafai ai . . . .

O i latou tonu lava ia e sili ona manaomia le fesoasoani o le a latou tofotofoina i nisi o taimi lo tatou onosai i le mea e gata ai. “Ia outou ne’i outou inosiaina sē tasi o i latou nei e faatauva,” o le fetalaiiga lea a Keriso, “auā Ou te fai atu ia te outou, o a latou agelu i le lagi e lē aunoa ona latou vaavaai i fofoga o Lo’u Tama o loo i le lagi” (Mataio 18:10). Ma o i latou la e auauna i nei agaga, ua fetalai mai le Faaola: “E faapei ona outou faia i sē aupito ititi o O’u uso nei, o A’u lea ua outou faia i ai” (Mataio 25:40).

O muaulu o i latou e faia lenei galuega o le a tauaveina pale o le faataulagafoina o i latou lava. Ae peitai o le a latou maua lo latou tau. I le lagi, o le a tatou vaai ai . . . ia i [latou] sa tatou fesoasoani i ai, o i latou sa tatou valaauliaina mai i o tatou aiga, sa tatou ta’ita’ieseina mai nai faaososoga. O le a tatou vaai i o latou foliga o lafoia mai ai le pupula o le mamalu o le Atua. “O le a latou vaai i Ona fofoga; o le a i ai foi i o latou muaulu Lona suafa” (Faaaliga 22:4).<sup>6</sup>

Ia amata nei ona tatou faia talaaga o [aso] taitasi a’o pasi atu i tua, o se talaaga o le a tatou lē tetemu tatou te fetai’i i le Faamasinoga. Ia tatou faatumuina nei aso taitasi uma lava i galuega alofa ma le agalelei mo isi. Ia tatou atia’eina o tatou malosi uma lava, ma ia tatou faia mea uma lava ua fuafua e le Atua e ao ona tatou faia.

O loo i ai le tau tele lava i le tausaiaina o poloaiga a le Atua. O loo faatali mai se tau i le tagata manumalo i le aso tele, pe a ia faalogoina mai i le fofoga o lo tatou Alii upu alofa ia, “Le auauna lelei e, ma le faamaoni;” ae o loo i ai foi se tau i le taimi leni i le filemu ma le fiafia o loo tafe mai i se mafaufau o loo ua malolo, mai i mautinoaga matagofie o loo tatou olioli ai i le alofa o le Atua.<sup>7</sup>

## *Siitaga*

<sup>1</sup> *The Review and Herald*, August 2, 1881

<sup>2</sup> *The Upward Look*, p. 132.

<sup>3</sup> *Sermons and Talks*, vol. 2, pp. 274, 275.

<sup>4</sup> *Testimonies*, vol. 5, pp. 199, 200.

<sup>5</sup> *The Youth’s Instructor*, October 22, 1896.

<sup>6</sup> *Testimonies*, vol. 6, p. 348.

<sup>7</sup> *The Signs of the Times*, January 1, 1885.

# Auaunaga Fa'a-tala'i i ou Tuaoi

Tusia e D.S.F. Boarim-Brazil

Ua ē manatunatu ea ina ia avea oe ma misionare i se atunuu i fafo? Ua tatou faitauina uma lava tusi eseese o tala moni o olaga o tagata tala'i o le tala lelei e tuua o latou laueleele na fananau ai ma latou o atu i nofoaga sili ona mamao ina ia faataunuuina ai faamoemoega o o latou olaga. E ese le matagofie o lo tatou vaaia o le loto tele ma le faafitia o mana'o o loo faailoa mai e le to'atele o nei ulua'i tagata tala'i. I le lotolotoi o faafanoga tetele ma le mativa, ua latou faatoilaloina ai e ala i le faatuatua mea faigata sa lē mafai ona faatoilaloina e le malosi faale-tagata ina ia faasalalauina ai le feau faale-Tusi Paia o le faamoemoe. Sa latou lē manana'o lava e faavaivai; o lo latou uiga e iloa ai i latou, o le finafinau lea. E eseese mai i le mano ni mano o loo faamalalaina e le popole ma le faanoanoa, o le talaaga o olaga o misionare a le Atua o loo fetaia'i ma tauiviga ma faigata e fetaia'i lava ma se i'uga fiafia.

O le tasi o mau sili ona maoa'e ma le taua i totonu o le Tusi Paia o loo maua i upu mulimuli a le aposetolo o Paulo, o loo faamatala mai ai le i'uga matagofie ma le mamalu o se olaga e tuu atu atoa i le auaunaga ina ia lavea'i. O le taimi lenei e pa'i mai ai pea nei upu i lagona silisili ona loloto i totonu o o tatou loto: "Ua ou sauni nei e ofoina atu lo'u ola, ma ua lata mai le taimi ou te alu ese ai. Ua ou tauina se taua lelei, ua ou faai'uina le tausinioga, ua ou taofia i le upu o le faatuatua: O lenei, ua teuina mo a'u se pale o le amiotonu, o le a foa'i mai ia te a'u i lea lava aso e le Alii le faamasino amiotonu: e lē gata foi ia te a'u, a'o i latou uma lava e fiafia i lona faaali mai" (2 Timoteo 4:6-8).

O Paulo o se faata'ita'iga lauiloa lava lea o se vaega o fetu pupula amiolelele o ē na ola ina ia lavea'i agaga. E mafai ona tatou matuā faapea ifo lava o le autu faatinoina o le olaga o Paulo o le lavea'i lea ina ia ola ma ia ola ina ia lavea'i.

Ia tatou manatunatu nei loa ina ia avea mo i tatou lenei autu mo i tatou. Sa taofia e Paulo se manatu na matuā taua lava, o lona uiga, sa lautele atu nai lo le tapulaa o lo tatou ola pu'upu'u. E toetiti lava a a'oa'oina e tapuaiga uma, o se tagata poto o le a ia faia le lalolagi lenei ma nofoaga sili atu ona lelei auā na sau ai foi o ia. O i latou sa nā ona ola mo i latou lava o lona uiga ua lē aoga olaga o loo latou ola ai. Ae lē gata ai i lea, o le a gaoieseina e le oti mai ia te i latou soo se faamoemoega lava o se ola oi lumanai. O le lagi o le meatotino lava lea a misionare! O auaunaga uma i le faailoaina atu o le talalelele (Keriso), o loo i ai iina se sini sili atu ona maua luga nai lo na'o le "faia o lenei lalolagi ma nofoaga sili atu ona lelei." O le tala'iina o le tala lelei ia Keriso o le auala faatinoina lea e sauni ai mo le lagi le tagata lea o loo a'oa'oina le upu moni e faapena ai foi ma lē o loo faalogo i ai. Ioe, e leai se tagata e agavaa mo le ola e faavavau e aunoa ma le atia'eina o lona lava olaga i le tala'iina o le tala lelei. A'o tatou faalatalata atu i tagata ma se naunautaiga moni ia fesoasoani ia i latou, ma ua faatuuina i tatou i le Agaga o le Atua, o i tatou lava o le a muamua faamanuiaina.

E faapefea ona tatou faailoa atu le alofa o le Atua i o tatou tuaoi – i se upu e tasi? O le faatinoina o le tala lelei ia Keriso o le tali lea, auā o le faatinoina lea o mea uma lava ua tatou a'oa'oina e faatatau i le alofa. A aunoa ma le faatinoina o a'oa'oga a Keriso, o le tatou tapuaiga ua na o ni manatunatuga, ma pa'ū maulalo ifo i faatinoga ma i'u ai i le lē fiafia. A aunoa ma lea, o lona uiga e leai se malosi o la tatou

tapuaiga e faafiafiaina ai i tatou. O le iuga la, o se Kerisiano fiafia ma le faatumulia i galuega lelei, o se Kerisiano moni lava ua ia maua le filemu ma le faaolataga i totonu ia Keriso, o le a ia faasoaina atu ma le fiafia tele le upu moni lea ua suia ai lona olaga.

### **O loo latalata mai agaga e ao ona lavea'iina**

Sa tatou amataina lenei suesuega e faatatau i le faailoaina atu o le tala lelei a Keriso e ala i faatinoga i laueleele ma atunuu mamao. E lē taumatea o se galuega lenei e sili ona lelei ma taua. Ae peitai a na o le manatunatu i le alu i atunuu mamao ese atu, atonu o le a galo ai ia i tatou o loo i ai foi agaga o loo latalata mai lava ia i tatou – agaga e foliga mai ua leai se faamoemoe ia i latou i lo latou lē malamalama ma atonu o loo latou manaomia le feau tonu lava lea o loo ia i tatou. E o'o lava i totonu o o tatou lava aiga e mafai ona i ai “tupe siliva o loo leiloa,” o i latou ia, ona o le leai o ni o tatou lagona alofa poo lo tatou faatalale, o lea ua latou o ese ai mai i le Atua. O ni nai laasaga laiti mai i o tatou aiga, o se tuaoi tatou te lē iloaina poo le lē masani foi i ona uiga atonu o loo ia natia i lona loto se lagona matuā leai se faamoemoe, o se mafatiaga o le a fesoasoani i ai le feau lea o loo ia i tatou. Ae o le tele lava o taimi tatou te manana'o tatou te o mamao lava, i le isi itu o le aai poo le isi foi itu o le lalolagi ina ia seleseleina ai a tatou fua ae o fua sili ona pula atonu o loo i tafatafa tonu lava o o tatou fale poo i totonu foi o o tatou fale. O lenei ata o loo faailoa mai e le Agaga o Valoaga. <sup>1</sup>

“O tagata Ekalesia taitasi uma lava, e ao ona ia lagona o lona tiute faapitoa lona galue mo i latou o loo nonofo i lona vaiaai poo lona nuu. Su'esu'e ina ia ē iloa pe faapefea ona ē fesoasoani i le tulaga sili lava ia i latou e lē o naunau i mea faale-tapuaiga.” <sup>2</sup>

### **O le auala e tala'i faamanuiaina ai le tala lelei**

O le auala e faamanuiaina ai le tala'iga, e matua taua tele lo tatou taliaina muamua o le auala lea: O le misionare faamanuiaina e lē faalagolago i le telē o le galuega ae o le taua o le aafiaga e faia. Ina ua uma ona afio ifo le Agaga Paia, o se lauga maoti na faia e se aposetolo na musaesae i le afi o le alofa o Keriso mo se lalolagi faafanoia, sa faataunuuina ai se i'uga maoa'e lava: O lena lava aso pe tusa ma le 3,000 agaga na talitonu ia Keriso! Maitau mai le taua tele o le aafiaga o le galuega na mulimuli ane na i'u ai i le to'atele o tagata papatisoia. I lenei la auala, O le faasologa o mea sili ona taua na suia ai le to'atele o tagata na maua! I se taumafaiga ina ia maua ni tagata se to'atele, ma fa'aalu a'i malosi uma e aunoa ma se uiga lelei faaleagaga, o le a i'u i se taumafaiga e leai ni ona fua. E lē faapea o le a lē manaomia ni taumafaiga sili ona taua. Ua faatonu mai le Tusi Paia ia i tatou ina ia tatou galulue ma le finafinau ma le lē faavaivai. “Ia lafo lau meaai i le vai: auā o le a e toe maua pe a mavae aso e tele. Avatu se vaega i le to'afitu, ma le to'avalu; auā e te lē iloa poo le a se mea leaga o le a tupu i le lalolagi . . . ia lūlū au fatu i le taeao, ma aua ne'i e limamau i le afiafi: auā e te lē iloa pe o le fea o le a manuia, poo lenei, poo lena, pe o le a tutusa ona lelei o ia mea e lua” (Failauga 11:1, 2, 6). Ae o le upu lava lea e tasi o loo ia faamanino maia, o lenei galuega, e faato'a manuia moni lava pe a faia i le agaga ma le mana o Keriso:

“O le mana tele lava na molimau atu ai le au aposetolo e faatatau i le toe soifua mai o le Alii o Iesu: ma sa tele le alofa tunoa sa i luga ia i latou uma” (Galuega 4:33). Tatou te manaomia ina ia i ai i totonu ia i tatou lenei mana ma le alofa tunoa atoatoa ina ia pa'i atu ma le mana a tatou molimau i loto. Afai e leai, o lona uiga o le a i'u ina tatou laugaina lauga e 3,000 ae aunoa ma se tagata e to'atasi e liua mo Keriso.

O le mea lea, o le a le aiaiga muamua lava ma sili ona taua mo auaunaga faamanuiaina? E tasi lava le tali o loo faamamafaina mai e le Agaga o Valoaga:

“O se sootaga taua ma le Leoleo mamoe Sili o le a avea ai le auauna ma faatusa ola o Keriso, o se malamalama moni lava i le lalolagi . . .

“O le tagata faigaluega na te iloa le uiga o le aufaatasi ma Keriso, e i ai foi lona faanaunaga faatupulaia i taimi uma lava ma lona malosi na te pu'eina ai le uiga o le auauna mo le Atua.” <sup>3</sup>

“E leai se isi na te iloa se mea ua leiloa e ala i lona taumafai e lauga e aunoa ma le fa’au’ūga a le Agaga Paia . . . I lenei tupulaga o le pogisa faale-agaga, o le a manaomia se mea e sili atu nai lo mafaufauga mago ma le mate ina ia osofia ai agaga o tagata . . . O Upu Moni Ola, e pa’ū mai i laugutu o le tagata o le Atua, o le a osofia ai tagata agasala ia tetemū, ma ē ua talitonu ina ia alaga faapenei, o Ieova o Ia o lo’u Atua; ua ou filifili ina ia ou tulai atoatoa i le itu a le Alii.”<sup>4</sup>

O le taumafai i se tulaga faamanuiaina i soo se taumafaiga lava i le auaunaga i tala’iga o le tala lelei e aunoa ma le fa’au’ūga a le Agaga Paia e matuā lē aoga lava ma valea e faapei o le taumafai e vaai i le pogisa e aunoa ma le malamalama. O le tulaga muamua lava la lenei ma sili ona taua mo le faamanuiaina, ma e mautinoa na pau lava lenei o le aiaiga, auā o le fesoota’i ma le Faia’oga ma le Ta’iala faalelagi, o le a tatou maua ai faatonuga ta’itasi uma lava ma le mana uma lava tatou te manaomia. O le a Ia faatonu mai i tatou i upu tatou te tautala ai ma gaioiga tatou te faia. O le a faapena ona Ia fausia le amio, faaleleia uiga, ma faatumu o tatou loto i le alofa mo agaga. Afai loa ua tatou alolofa moni lava i agaga na maliu ai Keriso, o le a mou ese loa mea faigata ia sa foliga mai e matuā tetele e pei o ni mauga, ma o le a tala’iina loa le tala lelei i se loto fuatia ifo ma o le a faia foi i se loto faamalieina, muamua lava e ala i a tatou amio, ona tala’iina loa lea e ala i a tatou taumafaiga faamisionare.

### **Faatoilaloina o mea faigata moni o loo faalavelaveina ai le tala’iina o le tala lelei**

O le taimi lenei, e faanoanoa ai, o ekalesia lauiloa ua latou fa’ataugofieina le suafa o Keriso. Ua lafoina e tagata tapua’i se tauemu i le galuega a le upu moni ona o a latou amioga lē lelei. O lenei tulaga ua tauau ina faama’a’aina ai tagata i lo latou lē talitonu, poo le matuā una’iina ai foi o i latou i se tulaga faaituau. O le faailoga tagata ua faapena ona faatupuina, e lē o se faigata laititi lea o loo fetaia’i nei ma le tagata tala’i o le taimi lenei o loo saili e faataunuaina lana galuega. E moni lava o i tatou uma lava ua fetaia’i ma i latou e foliga mai e fai mai: “E i ai la’u tapuaiga, ma ua faamalieina ai foi a’u. Alu e tala’i i isi e lē o i ai ni a latou tapuaiga.” O le latou alofaga lea.

“Ae o tapuaiga uma lava e tau uma atu lava i le Atua,” o le faamatalaga lea a isi ma se manatu faamaoni. O loo i ai isi o loo latou puipuia i latou lava i tua o le a’oa’oga lea o le Tupulaga Fou (New Age ideology), ma latou fai mai ai o le fiafia e mafai ona maua i ni nofoaga natia o le mafaufau faale-tagata. E le’i i ai muamua lava se taimi ua matua sili ona tele ai faaupuga faia e faatatau i le alofa ma le filemu, ae o le mea moni, e le’i i ai lava se taimi ua sili ona tele ai taua ma tala o taua e faapei o le taimi nei. E le’i faapea muamua lava i le talaaga o le lalolagi le to’atele o foma’i ma falema’i, a’o le faatupulaia ma le tele o faama’i e le’i faapea lava foi ona matautia e faapei o le taimi nei. O fale (houses) ma kamupani faatau fale ua faatupulaia i lo tatou siomaga, ae peitai o aiga (homes) ua matua mou ese lava i le uiga moni lava o le upu. Ae mulimuli ai, o loo matua tele lava le talanoaga e faatatau i tapuaiga, a’o le uiga faamisionare moni ua pa’ū atu i le “siama” lea o le Faa-Laotikaia. E mafai ea foi ona tatou aafia i lenei “siama” o le manao i fiafiaga, o le lē lagonaina o le lamatiaina, ma le faamaualuga faale-agaga? O le foliga pepelo lea o loo fa’auau pea i le taimi lenei ina ua matuā tele talanoaga o le taimi nei e faatatau ia Keriso, ae e le’i faapea muamua lava ona Ia lē afio i le loto faale-tagata. E ao ona tatou vailiiliina i tatou lava i nei autu.

Ua atia’eina e Satani i le taimi umi o le tomai i lana falefaigaluega o sailiiliga eseese o le agasala, auala lē mafaitaulia o loo faaaogaina e ia ma ona tagata ina ia faasese ma faatosina ai. Fai mai le fetalaiga a Keriso, “afai e mafai ai, [o Keriso pepelo ma perofeta pepelo] o le a faaseseina ai i latou lava ua filifilia” (Mataio 24:24). I lenei la itu, E toatele i latou o loo manatu e leai se mea e sili atu ona faigata nai lo le tala’iina o le talalelei! Ae peitai o iinei o loo i ai se lamatiaga: e ao ona tatou iloa le potele o le fili, ae aua lava ne’i tatou vi’ivi’iina lea potele. O loo i ai i le tagata faamaoni finafinau se amio/uiga agamalu lē mafuatia e sili atu le maualuga o lona mana ma lona potele. O le Agaga o le Atua e lē mafai ona faatoilaloina. A faatumulia loa i tatou i Lona mana ma Lona potele sili atu ona maoa’e, e leai ma se isi e mafai ona teena a tatou taumafaiga. Na pau lava lea o le taimi e mafai ai ona avea i tatou ma meafaigaluega manumalo, fafaguina ai loto ma ta’ita’iina ai agaga i aao o Keriso, e ui lava ina tatou fetaia’i ma le tele o tagata lē talitonu ma tagata taufaasese. Tatou te manaomia ina ia tatou manatua, o le

faaofuina i le talitā matagofie a le Atua, na mafai ai e le tama'i vaega laititi, matitiva ma le agamalu o so'o o Iesu ona suia le lalolagi o nā aso i le tala'iina o le tala lelei, ma o lena suiga faale-agaga o loo fa'auau pea e o'o mai i le aso nei!

### **Fuafuaga ina ia tala'i le tala lelei i o tatou tuaoi**

E pei ona tatou vaaia, i le lotolotoi o le faailoga tagata o le taimi nei, o le tele lava o taimi e faigata ai ona tatou talanoa atu i tagata i se faamatalaga tu'usa'o e uiga i tapuaiga. O nisi atonu e lelei lo latou malamalamaaga pe a mae'a ona suesueina se suesuega faale-Tusi Paia, ae e lē mautinoa ai i lenei tulaga se faamanuiaga a'o tatou vaaia le toatele o i latou e matua tele lo latou faaituau ma le faailoga tagata i tapuaiga. E aoga le alu atu mai i lea fale i lea fale, mai i lea aai i lea aai ma tala'i ai le tala lelei, ma e sili ona faamanuiaina a tatou taumafaiga e ala i le ole atu i agaga e ala i le faaaogaina o ni auala maoti o loo faailoa mai e le Agaga o Valoaga. A'o le'i faia se isi lava gaioga, e faapei ona faamamafaina muamua atu, tatou te manaomia ina ia tatou tauaveina i totonu o o tatou loto le alofa o Keriso, ma ia faailoa atu le naunau moni i le maloloina ma le faaolataga o i latou uma lava tatou te fesoota'i. O lenei uiga e faailoa mai ai le alofa faa-Kerisiano. Ona o la tatou mataupu e faatatau i le tala'iina o le tala lelei ia Iesu Keriso i o tatou tuaoi, ua matou faailoa atu ai nisi o auala ma fuafuaga o loo mulimuli mai:

### **Fuafuaga numera 1: O se aiga e faatulaga lelei ma usiusita'i**

O le auala lenei na aafia ai le tele o tagata ona o le amio a Aperaamo. O le manogi lelei o se aiga e faatulaga lelei ma faatonutonu lelei o le a faamanuiaina ai tuaoi ta'itasi uma lava. Ou te iloa se olaga o se aiga sa mata'ituina e se tuaoi e aunoa ma lo latou iloa i taeao o Sapati a'o latou o atu i le lotu. O a latou amio ma lo latou faautauta i o latou ofu sa pu'eina i le mafaufau o lea tuaoi. I le tasi aso na ia manatu ai loa e fesili atu ia i latou e faatatau i le latou tapuaiga, ma faapena ona tatalaina ai le faitotoa o suesuega faale-Tusi Paia. O se i'uga la, na avea ai o ia ma tagata ekalesia o lo tatou faatuatuga! E maitau i tatou e tagata – ma faitauina i tatou e faapei o se tusi matala, ma e mafai ona avea i tatou o se aafiaga malosi tele mo le lelei i o tatou siomaga.

Ae peitai e mafai foi ona tupu se mea leaga. Afai o lo tatou aiga o se laufanua lea mo taua, afai tatou te lē amio faa-Keriso i tagata, poo o tatou ofu poo o tatou uiga vaaia foi e matuā leai ma se eseesega ma le lalolagi, e faapefea ona tatou tala'i atu i o tatou tuaoi? Afai e lē o faamanuiaina o tatou lava aiga i le tala lelei, o le a mautinoa foi le leaga o o tatou aafiaga. O le mea lea, e lē mafai ona lava upu e faamamafaina ai **o le aiga**, o le sini muamua lava lea o le tapuaiga. I le isi itu **e ao ona tatou toe fausia le fata faitaulaga o le aiga**. I le isi itu, e ao ona tu'u ese loa nei aafiaga leaga o le agasala. O se lapataiga i a'upega o le ifo i tupua ma le amioleaga o le faaaogaseseina o T.V ma le Fesootaiga i luga o Computer (Internet).

### **Faaaloalo ma le amio lelei**

O tagata o amio faafouina, lelei o latou natura, ma le agalelei latou te tuuina atu se aafiaga e lē mafai ona teena mo le lelei. Atonu o o tatou tuaoi o i latou o ni tagata lē naunau mai ma lē lelei foi o latou uiga e tusa ai ma o tatou manatu, ae o le tele lava o taimi e lē mafai ona latou teena le faaaloalo moni faa-Kerisiano. E matuā mautinoa lava le talepeina ai i lalo o uiga faaituau ma le faailoga tagata. Tatou te lē o manana'o i se mea lelei e maua mai, ae o loo tatou ofoina atu i tatou ina ia tatou fesoasoani atu! E i ai le faaupuga faapea, “o lē e foliga mai e sili ona latalata mai, o le tuaoi lea.” O i tatou moni lava nei ia i latou. O uiga laiti o le naunau ma le faaaloalo e lē mafai ona leiloa. Soo se taimi lava e mafai ai, ofo atu lau fesoasoani e suiina ai se pa'u o le taavale, tui le nofoa faataavalevale o se tagata ma'i, poo le aveina foi o se ato o le faatauga mo se loomatua poo se toea'ina, ae faapena ai foi ma le tele o isi gaioga faapena o le faaaloalo. Ia ē naunau foi e taliaina se gaioga lelei e tuuina mai, ma faailoa atu lou loto faafetai. O uiga faigofie faapenei e mafai ona avea ma auala ua tuuina mai e le Atua ina ia faavaeina ai se mafutaga faalēuo e tatalaina ai le faitotoa mo le faasoaina atu o le tala lelei.

## **Galuega agalelei i ē mama'i ma fesoasoani**

Afai e ma'i se isi, e mafai ona tatou faailoa atu pe faia foi ma le faautauta ma le malamalamaaga i le mafuaaga, i totonu fo'i o le tulafono, ni togafitiga faigofie faale-natura. Afai e lē fiafia tagata i lenei ituaiga fesoasoani, e mafai ona tatou ofoina atu a tatou tatalo mo i latou, ina ia fesoasoani le Atua ia i latou e tusa ai ma Lona finagalo. I nisi o tulaga i mea e tutupu, e manaomia ai e tuaoi matitiva la tatou fesoasoani, ma o le a avea lenei ma auala mautinoa lava e aveesea ai le faailoga tagata a'o tatou fesoasoani ia i latou i o latou manaoga. Ae peitai o le tele lava o taimi latou te mumusu ai e ole mai mo se mea. Latou te manaomia ina ia fesili atu faapenei ia i latou, "E faapefea ona mafai ona ou fesoasoani atu ia te oe?" E ao ona tatou gaiogi e lē gata ina ia a'oa'o, ae sili ai i mea uma lava, o le faasoaina atu lea o le alofa faa-Kerisiano. O gaiogiga taitasi uma lava e faatinoina mo se isi e ao ona faia ma le tatalo faapenei: "Le Alii e, ia E pa'i mai i lenei tagata i le mana faamalolo o Lou Agaga Paia, ma ia E faaaogaina a'u iinei i le taimi lava lenei e avea o se a'upega o Lau faaolataga. Foa'i mai ia te a'u le tomai ma le poto ina ia faataunuuna ai se galuega lelei mo Oe."

## **Auala o le tala'iina o le tala lelei i le taimi lenei**

O le aiaiga sili ona taua o le galuega faamanuiaina, o le mana lea o le Agaga Paia. Ae peitai i le tele o mea e tutupu, o a'upega o fesoota'iga ua i ai i le taimi nei, e mafai ona avea o se auala sili ona taua ua faaaogaina e le Atua mo le faaolataga o tagata. Tatou te maua mai lisi o tuatusi o fesootaiga i luga o le masini o fesoota'iga (computer) a a tatou uo ma tuaoi ma tatou lafoina atu ia i latou olega faaleagaga, o loo natia ma le faautauta. Tatou te maua mai foi se lisi o aso fanau, ma tatou te lē misi lava ona lafo atu ia i latou feau o le faautautua i avanoa taitasi uma lava, o valaaulia ina ia suesue le Tusi Paia poo se pese foi poo se lauga taua lava. O tagata taitasi uma lava e ao ona o'o atu i ai le feau, ma o iinei la tatou te manaomia ai le poto faalelagi. E mafai ona tosina muamua lava le tagata e ala i se talanoaga e faatatau i le soifua maloloina. A'o le isi, o le a i ai le avanoa mo se suesuega faale-Tusi Paia i le Sapati. A'o le isi foi tagata o le a osofia ma faamafanafanaina o ia e se pese paia. O le ofoina atu faameaalofa o a tatou pepa ma tusitusiga i taimi faapitoa e faapei o aso fanau poo aso Kirisimasi foi, o se isi foi auala lelei lena. "Ou te manao e foai atu mo oe le tusi lenei ua aumaia ai se faamanuiaga tele lava ia te a'u, o lea ua ou manatu ai o le a faapena ai foi ona faia mo oe." E mafai ona tatou fai atu faapenei i o tatou tuaoi pe a tatou tuuina atu a tatou pepa o tusitusiga i o latou lima.

"Afai o le a faia lenei galuega e tagata uma lava ua iloa le upu moni a'o tuuina mai avanoa, ma faia ai gaiogiga laiti o le alofa i lea aso ma lea aso i le vaiaai o loo latou nonofo ai, o le a faaalua loa Keriso i o latou tuaoi. O le tala lelei o le a faaalua o se mana ola ae lē faapei o tala o le vavau fafauina ma le poto poo tala lē aoga taumatemate. O le a faaalua le tala lelei o se mea moni, ae lē o le i'uga o ni manatunatuga poo ni lagona naunau o se tasi. O le a sili atu le taua o lenei faaalua nai lo lauga poo ta'utinoga poo talitonuga." <sup>5</sup>

I se faamatalaga faai'u, Ou te mana'o e ta'u atu, afai o i ai lava se tiute o loo faatalale i ai i tatou, o le tala'iina lea o le tala lelei i o tatou tuaoi. Se'i tatou aioi atu loa nei ma le naunau mo le Agaga Paia o le Atua ina ia fesoasoani mai ia i tatou ina ia tatou faia lenei sini ma a tatou galuega muamua lava. Se fiafiaga o le a i ai, pe a tatou feiloa'i ma le au faaolaina i le ola e faavavau, i lo tatou vaai atu i foliga tatou te masani ai – e aofia ai ma foliga o o tatou tuaoi!

## ***Sitaga***

1 *Gospel Workers*, pp. 136-139.

2 *Testimonies*, vol. 6, p. 276.

3 *Gospel Workers*, p. 142.

4 *Ibid.*, p. 151.

5 *Testimonies*, vol. 6, p. 264.

# Fesoasoani I Puapuaga O Le Aiga-Tagata

“O le a si'i le taua e le isi malo i le isi malo, ma le tasi puleaga i le isi puleaga: o le a i ai foi oge, ma fa'ama'i, ma mafui'e, i nofoaga eseese. O nei mea uma o le amataga ia o faanoanoaga” (Mataio 24:7, 8).

Tusisa e Tony Maraizu-Nigeria

**E** iloa uma lava e tagata uma le mea e tupu pe a tula'i atu le tasi malo e tau ma le isi malo, poo lea foi tupu i lea tupu. O le mea moni, o le i'uga lē masalomia o nei taua o oge, o le leai o ni fale e nonofo ai, lē lavalavā, ma ma'i. O mea na tutupu talu ai nei ua faatupulia ai le puapuaga tele i le tele o tagata. O nei la tagata, o loo matua manaomia vave lava le fesoasoani.

“O le tulaga o mea o loo i ai nei i le lalolagi ua faailoa mai ai ua i o tatou luga tonu lava taimi o puapuaga. O nusipepa o aso taitasi ua matua tumu i faailo o se tauiviga matautia lava i le lumanai. O gaoiga leaga faia ma le lē fefe ua tupu i taimi uma. O tetee ua taatele. O gaoi ma le fasioti tagata ua faia i soo se itu.”<sup>1</sup>

Soo se mea lava e te alu i ai i le taimi lenei, o le a ē vaai ai i tagata i se tulaga mafatia lava ma le lē mafaamatalaina. I se taimi e le'i mamao atu a'o matou fo'i mai nai i se aai, sa matou vaai ai i se tama e tusa ma le 12 ona tausaga o tu mai i tafatafa o se laulau i tafatafa o le auala, o loo tu'u ona lima i luga o le laulau, ma lona ulu o loo punou e peisea'i o loo tatalo. A'o matou faatali mo la matou pasi matou te o mai ai, sa matou vaavaai atu ai pea lava ia te ia. E sili atu ma le 30 minute e le'i mafai ai lava e le tama ona minoi. Mulimuli lava na matou faato'a iloa ai ua oti le tama lea. A'o matou tuufesili poo le ā le mafuaaga o lona oti, e tele tagata na fai mai ia i matou, i lena aai faapitoa, o le tulaga lea e masani ona feoti ai tagata ona o le fia aai.

E faapei o so'o o Iesu Keriso, e to'atele o loo faaososoina ina ia manatu poo ai na agasala ua mafua ai puapuaga faapenei.

“A'o maliu ane Iesu, na ia iloa ai se tagata na tauaso talu ina fanau mai o ia. Ona fesili atu lea o Ona so'o ia te Ia faapea, Le Matai e, o ai na agasala, o ia nei ea, poo ona matua, ua mafua ai ona tauaso o ia ina ua fanau mai? Ona tali atu lea o Iesu, E le'i agasala o ia nei, poo ona matua: a ia faaalua ai galuega a le Atua ia te ia. E tatau ona Ou faia galuega a Le na auina maia a'u, manū o ao: e sau le po, e lē mafai ona galue ai se tasi” (Ioane 9:1-4). Ua faamanino mai e Iesu lava ia e lē sili a'e i tatou nai lo i latou o loo puapuagatia.

## **O mafuaaga e 6 o loo ala ai ona puapuagatia tagata i le taimi lenei**

1. O faalavelave i mea tutupu o le natura
2. Puapuagatia mo Keriso
3. O le lē atoatoa o le malosio o le tino
4. O faalavelave tutupu faafuase'i
5. Ma'i
6. Taua (war).

## 1. Faalavelave i mea tutupu o le natura

E tele tagata o loo puapuagatia i le taimi lenei, e lē ona o lo latou paie, ae ona o faalavelave i mea tutupu o le natura. E to'atele ua leiloa o latou fale mananaia ma a latou meatotino taua lava ona o le afi, mafui'e, afā, galulolo, ma mea faapena.

## 2. Puapuagatia mo Keriso

E to'atele ua leai ni o latou fale ma aiga po ua i le falepuipui foi i le taimi lenei ona o Keriso. Ona ua latou filifili e usitai i le Atua ae lē o tagata, o lea ua tuli faamalosia ese ai i latou e o latou nuu poo o latou malo foi mai i o latou fale ma aiga.

## 3. Lē atoatoa o le malosi o le tino

O loo to'atele tagata o loo puapuagatia ona o le lē atoatoa o o latou tino, aemaise ai lava tagata tauaso, pipili, ma tagata faapena.

## 4. Faalavelave Tutupu Faafuase'i

O se faalavelave o se mea lea e tupu faafuase'i e le'i mafaufauina ma e le'i manatu foi i ai, aemaise ai lava le faatupulia ai o se faaumatiaga poo manu'a foi. Ona o faalavelave tutupu faafuase'i, e miliona ma miliona tagata ua lē aoga i ni galuega i le taimi lenei. O le i'uga, o lo latou puapuagatia lea.

## 5. Ma'i

E to'atele tagata o loo mafatia i ma'i eseese, o loo mafua ai ona latou matua mafatia tele. O loo ta'u mai i le Upu a le Atua se fafine na ia faatauina atu ana mea uma lava sa ia te ia ona o le ma'i na ia ma'i ai. "O le tasi fafine, sa ia te ia le puna toto i tausaga e sefulu ma le lua, e tele foi mea na ia tiga ai i foma'i e to'atele, na ia foai uma atu foi ana mea sa ia te ia, ae peitai, na atili ai lona ma'i, ina ua faalogo o ia i a Iesu, ona alu ane lea i ona tua i totonu lava o le motu o tagata, ma pa'i atu i Lona ofu" (Mareko 5:25-27).

## 6. Taua

E to'atele i latou ua faamalosia ese mai o latou nofoaga, e miliona ma miliona tagata ua leai ni o latou fale ma aiga, ma ua faaumatiaina meatotino ona o taua. E leai se upu faale-tagata e mafai ona faamatalaina le ituaiga mafatiaga, le ituaiga tiga, le popolega, ma le puapuaga o loo i ai tagata i le taimi nei ona o taua. E matua tele tagata o loo feoti ona o le fia aai! E tele tagata ua lē atoatoa o latou tino ma e matua tele vae ma lima ua tipiese, o nei mafatiaga uma lava e mafua ona o taua.

E matua mautinoa lava e lē mafai ona tatou gugutu i lo tatou faapea o le mafuaaga ua le o'o mai ai ia i tatou nei puapuaga leaga faapenei, ona o se tasi o a tatou lava taumafaiga.

Ae ui i lea, o loo tatou saogalemu i le taimi nei ona o le alofa tunoa o le Atua. E leai se tagata ola e mafai ona asiasi mai i le nofoaga o loo o'u nofo ai e mafai ona ia lafoa'ieseina se fatu araisa e tasi, poo se fasi ieie.

O le mea lea, o i tatou o tagata o le Atua, e aunoa ma lo tatou taumafai e sailiili poo le agasala a ai ua o'o mai ai mafatiaga i olaga o tagata, e ao ona tatou faapea atu faatasi ma Iesu "ina ia faaalua ai galuega a le Atua" ia i latou. E aunoa ma lo tatou taumafai e sailiili poo le a le atunuu e sau ai lea tagata, e mafai ona tatou faapea atu faatasi ma lo tatou Alii o Iesu, "E tatau ona ou faia galuega a Lē na auina maia a'u manū o ao: auā e o'o mai le po, e lē mafai ona toe galue ai se tasi."

Ua uma ona faamanino mai e lo tatou Alii o Iesu Keriso soo se taimi lava tatou te faia ai galuega lelei mo isi, ua tatou faia fo'i lea ia te Ia lava. "O le a fai atu foi le Tupu i ē oi Lona itu taumatau, O mai ia, outou ua faamanuiaina e lo'u Tama, ia fai mo outou le malo na saunia mo outou talu ona faavaeina le lalolagi: Auā sa ou fia ai, ona outou avane ai lea o meaai ou te 'ai ai: sa ou fia inu, ona outou avane ai lea o ni vai ou te inu ai: sa fai a'u ma tagata ese, ona outou talia mai lea o a'u: sa ou lē lavalavā, ona outou fa'aofuina lea o a'u: sa ou ma'i, ona outou asiasia mai lea o a'u: sa ou i le fale puipui, ona outou o ane ai

lea ia te a'u. O le a tali atu fo'i ē amiotonu ia te Ia ma faapea atu, le Alii e, o anafea na matou iloa ai oe o fia ai, ma fafaga ia te oe? Po'o fia inu, ma avane e te inu ai? O anafea foi na matou iloa ai oe o le tagata ese, ma matou talia oe? Poo ē lē lavalavā, ma matou fa'aofuina oe? O anafea foi na matou iloa ai oe ua ma'i, poo i le fale puipui, ma matou o atu ai ia te oe? O le a tali mai le Tupu ma faapea mai ia i latou, E moni ou te fai atu ia te outou, auā na faia e outou i le tasi o ē aupito ititi o o'u uso nei, o a'u lea ua outou faia i ai" (Mataio 25:34-40).

Fai mai le upu e ala mai i le Agaga Paia, "O le a o'o mai i o tatou taliga tala e faatatau i ē matitiva ma puapuagatia i totonu o aiga, ma e tatau ona fesoasoani ia i latou ua puapuagatia ma mafatia. E laitiiti lava le mafatiaga faale-tagata o loo tatou iloa i soo se nofoaga o loo siomia i tatou, ae peitai a tatou maua loa le avanoa e ao lava ona tatou sauni ina ia tuuina atu le fesoasoani i le taimi lava lena ia i latou ua matua mafatia lava." <sup>2</sup>

O tagata matitiva, o meatotino ia a le Atua. Ua foa'i mai e Keriso lona soifua mo i latou. Ua Ia valaau mai ia i latou o ē ua Ia filifilia ina ia galulue e avea ma Ana auauna tausii mea, ina ia matuā foa'i atu mai i mea ua Ia foa'i atu ia te i latou ina ia fesoasoani ai i tagata ma lagolagoina ai Lana galuega i le lalolagi lenei. E mauoa le Atua i mea uma lava. Ua filifilia tagata ina ia galulue e avea o Ana teutupe i le lalolagi lenei. O mea ia ua Ia foa'i mai ia i latou e ao ona latou fa'aaogaina i le auaunaga ia te Ia." <sup>3</sup>

"A'o ē tatalaina atu lou loto i tagata matitiva ma puapuagatia o Keriso, o loo ē taliaina agelu e lē o vaaia. Ua ē valaauliaina le faatasi mai o agelu faalelagi. Latou te aumaia se siomaga paia o le olioli ma le filemu. Latou te o mai ma viiga i o latou laugutu, ma ua faalogoina ai foi se tali mai o viiga i le lagi. O gaioiga ta'itasi uma lava o le alofa, e usuina ma tāina ai lava musika ma viiga i le lagi." <sup>4</sup>

## *Ua faamanino mai e lo tatou Alii o Iesu, soo se taimi lava tatou te faia ai galuega lelei mo isi, ua tatou faia fo'i lea ia te Ia lava.*

"Ua faatonuina a'u, ina ia faasino o tatou tagata i le mataupu e 58 o le Isaia. Faitau ma le faaeteete lenei mataupu ma malamalama i le ituaiga auaunaga o le a aumaia ai le ola i totonu o ekalesia. O le galuega o le tala lelei e ao ona tauaveina e ala i faatinoga o lo tatou alofa foa'i e faapena ai foi i a tatou galuega. A ē fetaia'i ma tagata puapuagatia o loo manaomia le fesoasoani, ave i ai le fesoasoani. A ē maua i latou o loo fia aai, fafaga ia i latou. O le faia o lenei galuega, o le a ē galue lelei ai lava i galuega o le auaunaga a Keriso. O le galuega paia a le Matai o se galuega alofa lea. Ia faamalosia (encourage) nei o tatou tagata i soo se mea ina ia faia se latou vaega i lenei galuega." <sup>5</sup>

Fai mai le Upu a le Atua, "Amuia le tagata ua ia manatua lē ua mativa: o le a lavea'i le Alii ia te ia i le taimi o puapuaga. O le a tausii o ia e Ieova, ma faaolaina o ia; o le a faamanuiaina foi o ia i luga o le fogaeleele: o le a ē lē tuuina atu foi o ia i le manao o ona fili" (Salamo 41:1, 2).

"O lē ua alofa i le tagata mativa e avatu e ia ana mea ia Ieova; o mea foi ua ia foa'i atu o le a Ia toe totogi mai ai" (Faataoto 19:17).

"O lē ua punitia ona taliga i le tagi/alaga a le tagata mativa, o le a alaga foi o ia, ae o le a lē faafofogaina" (Faataoto 21:13).

"O lē ua mataalofa o le a faamanuiaina o ia; auā na te foai atu ana meaai i lē ua mativa" (Faataoto 22:9).

### **O le a le lautele e tatau ai ona tatou fesoasoani?**

O le to'atele o tagata talitonu e na'o a latou uo lava ma aiga ma tagata o le latou ekalesia latou te manatu i ai. Ma e leai ma so latou manatu i soo se tasi lava latou te lē masani ai. Na silafia e lo tatou Alii o Iesu o le a tupu lenei uiga i o tatou taimi, ma na Ia fetalai mai "Auā afai tou te alolofa atu i ē alolofa mai ia te outou, o le a se faafetai tou te maua? Auā e alolofa atu foi tagata agasala i ē alolofa mai ia i latou. Afai foi tou agalelei atu i ē agalelei mai ia te outou, o le a se faafetai tou te maua? Auā e faia foi e tagata

agasala lea lava mea. Afai foi tou te foa'i atu i ē tou te manatu ina ia maua mai ai se mea, o le a se faafetai tou te maua? Auā e foa'i atu foi tagata agasala i tagata agasala, ina ia latou toe maua mai ai se tupe faasili. A ia outou alolofa atu i o outou fili, ma agalelei, ma foa'i atu tupe e nonōina, aua ne'i toe faamoemoe e toe maua mai ai se mea; ona tele ai lea o lo outou tau, o le a avea foi outou ma fanau a Lē e Silisiliese: auā e agalelei o Ia i ē e lē faafetai ma e amioleaga. Ia faapea ona mutimutivale o lo outou alofa, e faapei ona alofa mutimutivale o lo outou Tama.” (Luka 6:32-36).

“O loo i ai nisi e faaalua lo latou alofa tele mo o latou aiga, mo a latou uo ma tagata e sili ona latou alolofa i ai, i latou ia e lē agalelei ma manatu i ē e manaomia le alofa naunau, i latou o loo manaomia le agalelei ma le alofa.

“Ia tatou fesili ifo nei ma loto naunau lava faapea, O ai lo'u tuaoi? O o tatou tuaoi e lē na o i latou o loo tatou fesoota'i i ai ma a tatou uo faapitoa, e lē na o i latou e patino i le tatou ekalesia, poo i latou e tutusa o tatou manatu. O o tatou tuaoi o le aiga tagata atoa uma lava lea. E ao ona tatou agalelei i tagata uma lava, aemaise ai lava i latou o le aiga o le faatuatua.”<sup>6</sup>

“O loo toatele o loo fesili faapea, e faapei ona faia e le loia, 'O ai lo'u tuaoi?' O le tali e sau ia i tatou i mea na tutupu i tafatafa o Ieriko, ina ua ui ane le faitaulaga ma le sāl Levi i le isi itu, ma tuua ai le tagata ese mativa, manu'a, ma le pagatia ina ia alofagia e le Samaria agalelei. Soo se tagata lava o loo puapuagatia ma manaomia le fesoasoani o loo tatou tuaoi foi lea. O atalii ma afafine uma lava o Atamu ua sē, o ē ua maileia e le fili o agaga, ma saisaitia i le nofo pologa o masaniga sese ua soloia ese ai foliga matagofie o le tane poo le fafine na faia e le Atua, o lo'u tuaoi lea.”<sup>7</sup>

“O puapuaga ma le pagatia o vasega uma lava o tagata o o tatou tuaoi foi ia; ma a tatou iloa loa o latou manaoga, o loo tatou tiute le fesoasoani ia i latou i le lautele e mafai ona o'o i ai le tatou fesoasoani. O loo i ai se tapulaa o loo aumaia i lenei faataoto o le a matua lelei lava mo so'o o Keriso lo latou faata'ita'i i ai. Ia muamua lava faamalie **manaoga tatau** o tagata puapuagatia ma fesoasoani i o latou manaoga ma mafatiaga faaletino, ona ē maua loa lea o se faitotoa matala i le loto, o le a mafai ona ē totoina ai le fatu lelei o le amio lelei ma le tapuaiga.”<sup>8</sup>

“A'o outou faaputuina mai i totonu a outou seleselega, ma faatumuina ai fale teu oa mo outou lava, na outou faafo'iina atu ea i le Atua se sefulua'i faamaoni? Ua ē avatu ea ia te Ia au meaalofa ma taulaga ofo, ina ia lē puapuagatia ai Lana galuega? Ua ē tausia ea lē ua aumatuā ma le fafine ua oti lana tane? O se lālā lenei o galuega faamisionare e faia i le aiga ma le nuu/tuaoi e lē tatau ona lafoa'ia.

“E lē o siomia ea oe e tagata matitiva ma mafatia o loo manaomia ofu mafanafana, meaai sili atu ona lelei, ae sili ai nai lo isi mea uma lava, o le mea lea o le a sili ona faatauaina – o le mutimutivale ma le alofa? O a ni mea ua ē faia mo fafine ua oti a latou tane, o ē o loo puapuagatia, o loo valaau mai ia te outou ina ia fesoasoani atu ia i latou i le fa'aa'ōgaina (educating) o a latou fanau poo fanau foi a a latou fanau? O faapefea ona ē tali atu i nei manaoga? Ua ē taumafai ea e fesoasoani i ē ua matua oti/leai ni matua? A ole mai matua poo matua foi o matua o loo popole ma mafatia o latou agaga ia te oe, ma aisi mai ia te oe, ina ia ē mafaufau loloto i loo latou manaoga, ua ē teena ese ea i latou i se lagona musu ma le leai o se alofa? Afai o faapena, Tau ina ia alofa atu le Alii i lou lumana'i; auā 'o le fua e te fuaina atu, o le a toe fuaina mai ia te oe' (Mataio 7:2).”<sup>9</sup>

“Na ou vaaia o le finagalo o le Atua ua mafua ai ona aumaia fafine ua oti a latou tane ma ē ua matua oti, tauaso, tutuli, pipili, ma tagata o loo puapuagatia i le tele o auala, i se sootaga vavalalata lava faa-kerisiano ma Lana ekalesia; ina ia tofotofoina ai Ona tagata ma faaalua ai o latou uiga ma amio moni. O loo vaavaai mai agelu a le Atua ina ia latou iloa po'o a o tatou uiga e faia i nei tagata o loo manaomia loo tatou alofa, agalelei, ma loo tatou lima foa'i ma le lē faapitoa.”<sup>10</sup>

O le tupe e telē tele lona taua, auā e mafai ona ia faia mea lelei tetele lava. O tupe i lima o fanau a le Atua, o meaai ia mo ē o loo fia aai, vaiinu mo i latou o loo fia inu, ma ofu mo i latou o loo lē lavalavā. O se puipui lea mo ē o loo puapuagatia, ma se auala o le fesoasoani mo ē o loo mama'i. Ae peita'i o le tupe e lē sili a'e lona aoga nai lo le oneone, seivagana lava ua faaogaina mo mea tatau e manaomia mo le ola, i le faamanuiaina o isi, ma le faaluina i luma o le galuega a Keriso.”<sup>11</sup>

## O le mea lilo o le faamanuiaina

O le mea lilo moni lava o le faamanuiaina, o le foa'i atu lea. O le mafuaaga lena na fetalai mai ai lo tatou Alii o Iesu Keriso, "E sili atu le manuia o le foa'i atu nai lo le talia" (Galuega 20:35).

E leai lava se tasi na te iloa le uiga o le foa'i atu, e faatali ina ia tau fesili atu ia te ia ina ia ia foa'i atu. O le foa'i atu ua suia ai olaga o le to'atele. O le foa'i atu e faapei o se fatu ua totōina i totonu o le eleele, lea e mautinoa lava e tataua ona fua tele mai ai i le seleselega.

Afai tatou te foa'i atu, o le a tatou maua fo'i. O le mea lenei ua fai mai ai le upu a le Atua.

"Foa'i atu, o le a foa'iina mai ai ia te oe; o le fua lelei, e lolomi i lalo ma luluina, e tumu ma solo i tua, o le a foa'i mai ai e tagata ia te outou. Auā o le fua tou te fuaina atu, e toe fuaina mai ai ia te outou" (Luka 6:38).

I le 1 Tupu 17:10-16 tatou te maua ai le mea na tupu ia Elia ina ua ia "alu i Sarefata. Ma ina ua o'o o ia i le faitoto'a o le aai, faauta, o loo i ai le fafine ua oti lana tane o loo fai fafie: ona ia valaau atu lea ia te ia, ma fai atu, Se'i ē aumai sina vai itiiti i se ipu se'i o'u inu ai. Ma a'o ia alu atu e aumai, na ia valaau atu ia te ia, ma faapea atu, Se'i ē aumai i lou lima se fasi areto ma a'u. Ona ia fai mai lea, E faapei ona soifua o le Alii lou Atua, e leai sa'u areto, ua na o le luutaga o falaoamata i le paelo, ma sina suau'u ititi i le fagu: faauta foi, o loo o'u aoina nei ni fafie se lua, ina ia ou alu ma tunu ai mā ma'ua ma si a'u tama tane, ma te aai ai ona mā oti ai lea. Ona fai atu lea o Elia ia te ia, Aua ē te fefe; alu ma fai e faapei ona ē fai mai: a ia muamua ona ē fai se potoi areto ma a'u, ona aumai lea ia te a'u, ona ē faia mulimuli lea mā oulua ma lau tama tane. Auā ua faapea ona fetalai mai o le Alii le Atua o Isaraelu, O le a lē uma le paelo falaoamata, o le a lē faaititia foi le fagu suau'u, se'ia o'o i le aso e foa'iina mai ai e le Alii le timu i luga o le fogaeleele. Ona ia alu lea ma faia e tusa ai ma upu a Elia: o ia, ma Elia, ma lona aiga, sa latou aai ai i aso e tele. E le'i uma le paelo falaoamata, sa lē faitiitia foi le suau'u i le fagu, e tusa ai ma le afioga a Ieova na ia fetalai atu ai e ala ia Elia."

O le fafine lenei sa sauni e oti ma lana tama ona o le fia ai pe a uma ona ai le la meaai mulimuli. A ua faateleina e le Alii a la meaai ma sa la aai ai mo le tolu ma le afa tausaga o le mala la ma le oge.

Aisea na fa'ateleina ai e le Alii a la meaai? E le'i faia i se vavega faamaneta (magic). E lē o se vavega faapitoa. O faamanuiaga a le Atua e i ai ona aiaiga. Fai mai Iesu, "Foa'i atu, ma o le a foa'iina mai ai ia te outou." (Luka 6:38).

O le mea lilo o le mauaina mai, o le foa'i atu lea. E to'atele tagata na feoti i Isaraelu i lena vaega taimi o le tolu ma le afa tausaga o le mala la ma le oge, ae na ola le fafine ua oti lana tane o Sarefata ma lona aiga. O nei manuia uma, na ia maua ona sa ia iloa o le mea lilo i le mauaina mai o mea mai i le Alii, o le foa'i atu lea. "Aua ne'i faaseseina outou; . . . auā o le fua e luluina e se tagata, o le fua fo'i lena o le a ia seleseleina" (Kalatia 6:7).

E faapena foi, "ina ua ui atu Elisaia i Sunema, sa i ai le tasi sa'o tama'ita'i; na ia pulunaunau mai ia te ia se'i 'ai. Ona i'u ai lea ina afe so'o ai o ia e 'ai ai i ana Malaga i lea ala. Ona fai atu ai lea o ia i lana tane, Faauta mai, ua ou iloa o le tagata paia o le Atua lenei, o lē e sau so'o ia te i ta'ua. Ia ta faia se potu itiiti i luga e fai i le pa (wall) puipui o le fale; ia ta tuu ai se moega mo ia, ma se laulau, ma se nofoa, ma se tuugalamepa; a sau foi o ia ia te i ta'ua, i le alu ane i ai o ia. O le tasi aso na o'o atu ai o ia i lea mea, ona ulu ane lea i le afeafe, ua taoto ai. Ua fai atu o ia ia Kiasi lana auauna, Valaau ia i lena tama'ita'i Sunema. Ona valaau lea o ia ia te ia, ona tu mai ai lea o ia i ona luma. Ona fai atu lea o ia ia te ia, Faauta, ua tigaina oe ona o'i ma'ua i nei sauniga uma, se a se mea e faia mo oe? Pe ta'u ea oe i le tupu, poo le alii e pule i au? Ona tali mai ai lea o ia, Ou te nofo faatasi ma lo'u nuu. Ona fai ane lea o ia, Se a se mea e faia mo ia? Ona tali mai ai lea o Kiasi, E leai sana tama, ua toea'ina foi lana tane. Ona fai atu lea o ia, Valaau atu ia te ia. Ona valaau atu lea o ia ia te ia, ona tu mai ai lea o ia i le faitotoa. Ona fai atu lea o ia, O lela tausaga, o le a ē sapai ai i sau tama tane. Ona tali mai lea o ia, Aua, le alii e, le tagata o le Atua, aua e te oleole mai i lau auana fafine. Ona to ai lea o le fafine, ua fanau mai ai lana tama tane i lea tausaga, e faataua i le tau o le olaga sa fai atu ai Elisaia ia te ia. (2 Tupu 4:8-17).

O se fafine lenei e le'i i ai sana tama, e le'i i ai foi sona faamoemoe i le mauaina o sana tama, ae ona o lana tausiga mo le perofeta, na tauia ai o ia e le Alii i le fua o lona lava manava. E faapei la ona tatou vaaia i le faamatalaga o loo i luga, sa sauni le Alii e foa'i mai ia te ia soo se mea lava na ia mana'o ai.

### Luluina ma le Seleseleina

Fai mai le Upu a le Atua, "A'o tumau pea le lalolagi, o le a lē muta ai foi le taimi e lulu ai ma selesele ai, o le maalili foi ma le vevela, o le tauvevela ma le tau malulu, ma le ao ma le po" (Kenese 8:22).

I le taimi e totō ai laau, soo se tasi lava e musu e totō nai fatu saga laiti o loo i lona lima, ona o lona fefe ne'i leiloa ia fatu, o le a fia ai fo'i o ia. Ae ui i lea, soo se tasi lava na te totōina o le a taumasuasua foi lana seleselega, auā ua fuafua le Alii a tatou lulu (foa'i), o le a tatou selesele foi (maua mai). O le mea moni lava, o le mafuaaga e ala ai ona matitiva ma mafatia le to'atele, ona o lo latou mumusu e lulu (foa'i).

"O loo i ai lē na te faasalalauina ana mea, ae e atili faateleina ai; o loo i ai foi lē na te taofia ana mea e sili i mea ua tatau ai, ae e mativa ai o ia" (Faataoto 11:24). O loo i ai tagata e lē muta lo latou tatalo mo tagata matitiva ma ē puapuagatia. Latou te tatalo ina ia auina atu e le Atua meaa, lavalava, ma mea faapena, ae galo ia i latou, o tagata o le Atua i luga o le fogaeleele lenei, o Ana meafaigaluega ia.

Fai mai le tusi a le aposetolo o Iakopo, "O'u uso e, o le a le aoga, pe a fai mai le tagata o loo ia te ia le faatuatua, ae leai ni galuega? E mafai ea e le faatuatua ona lavea'i ia te ia? Afai ua lē lavalavā se uso poo se tuafafine, ua leai foi sana mea e ai i lea aso ma lea aso, ma fai atu se tasi o outou ia te i latou, Inā o ia outou ma le filemu, ia mafanafana ma ia ma'o'ona, a ua lē foa'i atu ia i latou mea ia e manaomia mo le tino; o le a le aoga? E faapena foi le faatuatua, afai e leai ni galuega, e mate lava ia, auā ua na'o ia" (Iakopo 2:14-17).

E i ai se uso e maitauina ona o lona tatalo i taeao uma lava mo tagata matitiva. Ae peitai, a'o le'i faai'uina ana tatalo, na te faapea atu, "Le Alii e, auina mai ia te a'u se tagata e mafai ona ou fesoasoani i ai i le aso lenei." O le iuga la, i lona ala aga'i atu i le galuega, le ala lea e savavali ai tagata i maila e tele ona latou te lē gafatia le togiina o le pasese i le pasi, e masani ai lava ona ia mauaina atu se tasi o loo talotalo ane ia te ia mo se auala aga'i atu i mea o loo latou o i ai. Ma a'o ia aveina la i latou nei i lana taavale, na te maua ai foi ma se avanoa i le loto lea na te totōina ai le fatu lelei o le upu moni.

Ioe, ua valaau mai le Alii ia i tatou ina ia tatou fesoasoani i le aiga-tagata mafatia. O le a tatou faia ea lenei galuega ma le lē faautauta ma le faatalalē? E leai!

"E faatatau i tagata matitiva – o sini nei o le alofa . . . e leai se tiute o tagata o le Atua ia i latou o le a fa'aauau pea ona faaagaina tapa'a, kofe, ma le ti. O nisi o tagata matitiva e vave tele ona latou tuuina atu molimau tu'usa'o uma lava i luga o tauau o tagata o loo i ai a latou meatotino, ae peita'i o loo i ai se mea mo i latou e ao ona latou faia, o se galuega e tatau ona latou galulue ai. E ao ona latou faafitia le tuinanau o le mana'o i le ai. O iinei e mafai ona latou faia ai se taulaga ofo faafitia ai i latou lava. Ua valaau le Atua ia i latou ina ia latou faia lenei taulaga ofo. Ma a uma ona latou tuueseina nei mea faamanu'aina ai i latou, afai latou te o'o i tulaga ma ala vaapiapi a'o latou taumafai e faia le mea sili e mafai ona latou faia, o le a avea ma avanoa sili ona taua mo o latou uso/tuafafine o loo mafai ona fesoasoani, ina ia fesoasoani ia i latou i o latou faigata." <sup>12</sup>

Na faatonu mai e lo tatou Alii o Iesu i upu manino lava, soo se tasi lava o loo mafai ona fesoasoani i mafatiaga o tagata puapuagatia ae e musu e fesoasoani, e lē mafai ona ulufale atu o ia i le malo o le Lagi.

"O le a Ia fai atu foi ia i latou o loo i Lona itu tauagavale, O ese atu ia nai ia te A'u, outou ua faamalaiaina, i le afi e faavavau, ua saunia mo le tiapolo ma ana agelu: Auā sa ou fia ai, ae tou te le'i avane ni mea tou te aai ai. Na ou fia inu, ae tou te le'i avane ni vai ou te inu ai; Sa fai a'u ma tagata ese, ae le'i talia a'u e outou; sa ou lē lavalavā, ae tou te le'i faaofuina a'u, na ou ma'i, sa ou i le fale puipui foi, ae tou te lē'i asiasia a'u. O le a latou tali atu foi ia te Ia faapea, Le Alii e, o anafea na matou iloa ai oe ua

fia ‘ai, pe fia inu, poo se tagata ese, pe lē lavalavā, poo ma’i, poo i le fale puipui, ma matou le’i auauna atu ia te oe? Ona tali atu ai lea o Ia ia te i latou, e faapea atu, E moni, ou te fai atu ia te outou, auā na outou lē faia i le tasi o e aupito ititi o i latou nei, o A’u lea ua outou lē faia i ai. Ma o i latou nei o le a o ese atu i le faasalaga e faavavau: a’o ē amiotonu o le a o atu i le ola e faavavau.” (Mataio 25:41-46).

O lo tatou mauaina o nei folafolaga taua uma uso e, ma tuafafine, “o lea ia aua ne’i tatou faavaivai i le agalelei: auā o le a tatou seleseleina lava i ona taimi e tatau ai, pe afai tatou te lē faavaivai” (Kalatia 6:9).

“Auā e lē amiolētonu le Atua Na te faagaloina ai a outou galuega o le alofa, ua outou faailoa mai i Lona suafa, ina ua outou auauna atu i le au paia, ma ua outou auauna atu” (Eperu 6:10).

Ia tatou ta’utino nei i le Alii, e amata atu nei o le a tatou faia mea uma lava e mafai ona tatou faia ina ia fesoasoani ai i mafatiaga o le aiga-tagata. E tusa lava poo le foa’iina atu ai o le tatou meaai mulimuli lava mo ē o loo fia aai, o le a matuā tele lava lo tatou tau, “Ia faapea ona susulu atu lo outou malamalama i luma o tagata, ina ia latou vaavaai i a outou galuega lelei, ona latou vivii atu ai lea i lo outou Tama oi le lagi” (Mataio 5:16).

## ***Sitaga***

1 *Testimonies*, vol. 9, p. 11.

2 *Welfare Ministry*, p. 137

3 *Ibid*, p. 272

4 *The Desire of Ages*, p. 639.

5 *Welfare Ministry*, p. 29

6 *Reflecting Christ*, p. 229.

7 *The Review and Herald*, November 12, 1895.

8 *Testimonies*, vol. 4, pp. 226, 227.

9 *Counsels on Stewardship*, pp. 46, 47.

10 *Welfare Ministry*, pp. 35, 36.

11 *Christ’s Object Lessons*, p. 351.

12 *Manuscript Release*, vol. 15, p. 336.

Aso Lulu, Tesema 6, 2006

# Mutimutivale i Faatinoga

Tusia e Rosario Dizon – Philippines

O le a lea upu o le alofa mutimutivale? O loo faamatalaina o le lagona lea e oso a’e ona o mafatiaga o isi, faatasi ai ma le faanaunauga ina ia fesoasoani ia i latou. I lenei la uiga, e matuā o gatasi lelei lava ma le faatuatua ma le agamalu. A’o fai mai le “agamalū” e “lē mafai ona ou faia” ma fai mai le faatuatua e “mafai ona faia e le Atua,” o le alofa mutimutivale na te sailia auala e faaitiitia/fa’amāmāina ai puapuaga o i ai. I luga o se faavae faapea, e leai ma se Kerisiano o le a aunoa ai ma ni galuega lelei. O le faatinoina o le alofa mutimutivale, tatou te faaauau ai pea ona tatou tutupu ma fausiaina a’e se amio paleni faa-Kerisiano. O lenei tuputupua’e e manaomia auā o le olaga faa-Kerisiano atoa lava e ao ona tumau i totonu o le finagalo o le Atua. I totonu o le Tusi Paia ma Molimau, ua tatou maua ai le faaaliga manino lava o

Lona finagalo e faatatau i a tatou amio ma gaiioiga. E matuā taua lava lo tatou liliu ese mai i le taulotoina o tulafono o ni talitonuga faatuina ma ni tulafono o ni mataupu, ma liliu atu i a’oa’oga moni o le Faale-Kerisiano faatinoina e faapei ona faailoa mai e Iesu i Lona olaga pu’upu’u i luga o le fogaeleele. “O le a outou iloa foi le mea moni, o le a tuusa’oloto foi outou e le upu moni” (Ioane 8:32). A’o tatou tumau i upu a le Atua, o le a tatou tutupu ai foi faale-agaga se’ia o’o ina vaaia le tumu atoatoa o le uiga Faa-Kerisiano i totonu ia i tatou. O le tagata-matua faale-agaga, e leai se i’uga ia te ia lava. Tatou te tutupu a’e ma foa’i atu ma avea i tatou ma faamanuiaga. A’o tatou inuina le vai ola i totonu o upu a le Atua ona avea ai loa foi lea o i tatou o se vaitafe ola o loo i ai le ola auā a’o fa’auau ona ia taliaina le vai, na te foa’i atu foi le vai i le taimi lava lea.

### **Iesu, le Faata’ita’iga o le Alofa Mutimutivale**

“A’o tatou taumafai tatou te faamasani ma lo tatou Tama oi le lagi e ala i Lana upu, o le a faalatalata mai agelu, o le a faamalosia o tatou mafaufau, o le a siitiaina ma faaleleia a tatou amio. O le a sili atu ona faapei i tatou o lo tatou Faaola.”<sup>1</sup>

O le manava i le ea o le lagi ma ola i le olaga o le alofa mutimutivale faale-Atua, e ao ai ona tatou faaalua i a tatou amio le uiga o Ia o loo tatou ifo i ai i le taeao ma le afiafi. O le mafutaga a Iesu ma le Atua i aso taitasi e aofia ai le fausiaina a’e o vaega uma lava o Ona tomai o le a avea ma fesoasoani e lē gata ia te Ia lava ae faapena ai foi i isi. O le tele lava o Ana auunaga sa faia lea i tagata matitiva. “Sa Ia iloa e ala i le olaga sa Ia ola ai, o latou popolega ma manaoga ma faigata, ma sa mafai ona Ia faamafanafana ma faalototele tagata faigaluega agamalu uma lava.”<sup>2</sup>

E le’i i ai lava se taimi na Ia lē fesoasoani ma lē aapa atu ai i isi, ma faailoa atu ia i latou le alofa o le Atua i auala maumaututū lava. Na Ia alofa atu i le ie solo, ma fufuluina vae palapala o Ona so’o ma soloi i o latou vae i se alofa sa auuna. Sa Ia alofa i se leo alofa a’o Ia fetalai atu ia Sakaio, “Sau ia i lalo; auā e tatau ona Ou i ai i lou fale i le asō” (Luka 19:5). Sa Ia alofa i foliga mataalofa ina ua Ia silafia le tulaga e mafai ona o’o i ai Simona Peteru a’o Ia faapea atu ia te ia, “Fafaga i A’u mamoe” (Ioane 21:16). I le fafine na maua atu o mulilua, na fetalai atu faapea Lona alofa faamalolo, “Alu, aua e te toe agasala” (Ioane 8:11). O Lona alofa tigā sa faaalua ina ua matuā tulia i fafo o le Malumalu e le sasa sa ia te Ia ē sa fefaataua’i. Ae sili ai i mea uma lava, na Ia alofa i le satauro – o se alofa sa faaalua atoatoa lava e mafai ona lavea’iina ai i tatou uma!

### **Ua faamanuiaina i tatou ina ia avea i tatou ma faamanuiaga**

Fai mai George S. Schuler, “I ala tetele ma alā tua o le olaga, e toatele i latou o loo vaivai ma faanoanoa ai; tauave le susulu o le la i nofoaga ua matua loloto ai le pogisa, ma faafiafia i ē o loo faanoanoa; foa’i e faapei ona ‘foa’iina mai ia te oe i ou manaoga, alofa e faapei ona alofa mai le Matai ia te oe, ia avea oe ma fesoasoani ia i latou ua leai se fesoasoani, ia ē faamaoni i lau galuega; ia faia a’u ma faamanuiaga, ia faia a’u ma faamanuiaga, ia susulu atu Iesu i lo’u olaga.”

## *O avanoa laiti e masani lava ona pasi atu e aunoa ma le iloaina.*

Se pese malosi ma le matagofie a ō tatou agaga, e peseina pe a tatou manatunatu i le alofa tunoa ma le alofa o le Atua. O le manatu faale-tagata o le tagata e faatatau ia te ia lava lea o loo i totonu ia i tatou, e pule aoa i se mafaufau, tino, ma se agaga o loo faapena ona manatu faapito ifo ia te ia lava, e aunoa ma le manatu i isi. “E faapei ona ia manatu i totonu o lona loto, e faapena foi o ia” (Faataoto 23:7). Afai o loo tatou manatu ia tatou loto gatasi ma le Alii, o le a faapena ai loa lava ona tatou gaiioi ai. O le a te’i lava ua tatou manatu i isi a’o tatou manatunatu ia Iesu. O le luluina o le fatu lelei i totonu o o tatou mafaufau o le a i’u ina “faapena ai foi i tatou.” O lo tatou faatagaina o lea fatu ia tupu, o le a vave lava ona aumaia ai se uiga alofa mutimutivale, e faapena ai foi ma le ola maloloina ma le manuia. Na vaaia moni lava e le tupu o

Solomona lea manuia ina ua ia fai mai, “Aua ne’i te’a ia mea mai i ou mata; ia ē teuina ai i le ogatotonu o lou loto. Auā o le ola ia i ē ua maua, o le ola maloloina foi i o latou tino uma lava” (Faataoto 4:21, 22). E moni lava a’o faamaloloina i tatou e le Atua, tatou te faamalolo atu foi i isi auā ua avea i tatou ma tagata e fausiaina ala-laupapa e fesoota’i atu ai i isi auā ua fausiaina a’e le alofa mutimutivale moni mo tagata i totonu ia te i tatou. Aisea e faia a’i lenei mea? E lē o Iesu ea o le tagata mo isi? A ua valaauina foi i tatou ina ia faapei o Ia mo isi. O tagata toe fuata’i moni lava, e lē na ona latou feoa’i solo e saili se tasi e lafo i ai upu moni faale-agaga ma mataupu lē ta’uta’ūa e faapei o le ai fualaau, toe fuata’iina o lavalava/ofu, ma isi mataupu faapena. O le uiga faapena o le a liliueseina ai le toatele o tagata. Afai e moni lo tatou alofa mo tagata, e toatele tagata o le a tosina ia Iesu e faapei ona tosina o nutigāu’amea i le maneta. O loo valaaulia mai e Iesu tagata ina ia tofusua i Lona olaga ma ia ofo atu le valaaulia i isi. Manatua foi ana asiasiga ia Maria, Mareta, ma Lasalo? Na Ia asiasi foi i le sunako ma fesootai ma Faresaio ma telona. O le alofa mutimutivale moni ma le faamaoni o le ki lea i le faasoa atu ma le tufa atu. O le isi itu o le faasoaina atu o lo tatou faatuatua o loo masani lava ona faamamafaina. O le vaega lea e faatatau i le faalogo. E masani lava ona tatou faalogo ma vaai i tagata a’o tatou tautala. Tatou te lē faalogo ma le alofa e faapei o le tulaga e tatau ona tatou faia ai. O le mafuaaga, ona o loo tatou faatali mo le avanoa tatou te tautala ai. O le i’uga la, o a tatou talanoaga e lē loloto le ati atu i olaga o tagata. O nisi o i tatou o ni tagata tautatala faalenatura. Atonu tatou te foliga mai o loo tatou faalogo, ae o le taimi lava lea e ese le mea o loo alu i ai o tatou mafaufau, e tusa lava pe taua tele ia i tatou le tagata lea o loo faasoa mai. O le itu lenei tatou te manaomia ai ina ia tatou faatali, ma toe manatunatu i mea e aoga ma tatau mo molimau moni. Tatou te manaomia ina ia tatou faalogo lelei lava e lē gata o le faalogo i upu a isi, a’o lagona foi o loo aumaia e nā upu. O se tagata alofa mutimutivale na te atia’eina le meaalofo lē leoa o le faalogo auā o lana sini o lona iloa lea ma malamalama i manaoga o isi. O nisi tagata e faalogo ma le lē fiafia. O le taimi lava e tautala mai ai le tagata i se mea latou te lē malilie i ai, ona latou faalavelave loa lea ma tuu atu loa le a’oa’iga. O isi tagata e faalogo i mea latou te fia faalogo i ai ae lē faalogo i mea latou te lē fia faalogo i ai. Na o mea lava latou te fiafia i ai e faalogo i ai. Ae peitai o le alofa mutimutivale faatinoina, o le a faalogo ai ma le faaeteete se tagata ina ia o’o atu lona alofa i totonu o le loto o lē o loo tautala mai ma sailia loa auala ina ia faamāmāina ai ona mafatiaga ma ona tiga. O le sili atu o le faalogo nai lo le tautala, tatou te fausiaina ai auala laupapa e fesoota’i ai ae lē o le talepeina i lalo o nei sootaga.

O le faia o gaioiga ma galuega lelei, o le faailoaina atu o le alofa, e lē o le faia lea o ni gaioiga e faaalua ai le toa i se faafitauli telē lava. O avanoa laiti o loo masani lava ona pasi ese atu e aunoa ma le iloaina – o le aveina atu o se meaai i se aiga pe a faataotolia i le falema’i le tamā poo le tinā foi, valaauliaina o se tuaoi i se faatasiga, asiasia o se uo ua tuua toatasi poo le afe atu foi e faalogo i se tasi ua matua lona olaga ma mafatia. Ae o le mea e leaga ai, o le manatu lea, “O a’u foi, o loo i ai foi o’u faafitauli ma ou te manaomia foi le fesoasoani e sili atu nai lo oe” e faaleagaina ai le ekalesia mai i lona tuputupu a’e. O tagata ekalesia o loo i ai le latou sini mo le faasalalauina o le tala lelei e tele lava ina foliga mai e misi ia i latou o latou tuaoi.

I le aoauli o le tasi Sapatu, sa matou manatuaina ai ma le au uso se lesona, e lē tatau ona taofia i taimi uma le Sapatu i totonu o le Falesa/malumalu. Ona matou filifili ai loa lea matou te asiasi atu i o matou tuaoi ma lo matou nuu. Na matou aumaia le tusi pese ina ia usuina ai ni pese ma tatalo mo aiga taitasi uma lava o loo i sasa’e, sisifo, matū, ma saute o le ekalesia. O le matou feau lē tautalagia o le: Matou te alolofa, e alofa le Atua ia te outou, ma o le a foi se mea e mafai ona matou faia ina ia matou fesoasoani ai? Sa matua ofo lava aiga – i le fetai’a’i ma tagata asiasi e pei o i matou ma ofu lima uumi i le taimi sili ona vevela o se aoauli mafanafana. I o latou mata sa matou vaaia ai le uiga o o latou foliga taliaina fiafia o i matou, aemaise ai lava ina ua matou fai atu na matou o atu e tatalo mo o latou manaoga ma lo latou faamalologa. E na o ni nai minute lava na matou tatalo ai, ma sasaa atu o matou loto ina ia faafofoga mai le Atua ma faamanuia mai i le aiga atoa. E i ai se tasi tamā na fai mai na manaomia lava e lona aiga talosaga, auā o le taimi lena, faato’a uma lava ona misa ma lana avā ma e lē’o fetautalaa’i ma lana avā i le taimi lena. Sa matou tuua ni tusi mo i latou, faasoa atu i ai vailaau faia i laau o le natura, ma

opo atu i si ulugalii. Sa loimatā uma o la mata ma amata loa ona toe fetautalatalaa'i le tasi i le tasi a'o la ta'ita'iina atu i matou i le lotoā i luma.

O le isi aiga sa latou matuā taliaina ma le fiafia le tatalo o le mea lea na toe aumaia ai le manaoga o le tina mo se isi tatalo ina ia faia mo le tama a lana tama o loo ma'i. E tele lava foi faamanuiaga eseese sa matou maua i aiga eseese, ma o nei fetaia'iga taitasi e taua uma lava faamatalaga e faatatau i a matou feiloaiga. I savaliga i Sapati taitasi, e mamao lava maila matou te savavali ai i se auala palapalā ma le maugā, ae peitai o le auaunaga i talosaga na faatumauina ai lo matou malosi faaletino ma aumaia ai le agaga faamalieina i o matou loto. E le'i vaai tagata i o matou vaivaiga poo o matou faafitauli foi. Sa nā ona lagonaina lava e o matou tuaoi le faatasi mai o le Alii i o matou olaga. O taimi uma lava tatou te taula'iina atu ai o tatou manatunatuga i Lana auaunaga, e i ai le mana o le tatalo e pa'i atu ai i isi olaga.

E manaomia e le lalolagi le alofa mutimutivale, o tatalo, ma le fesoasoani a tagata o le Atua. E manaomia e le lalolagi ina ia vaai ia Keriso i olaga o Ona soo. Ae o loo faapena foi ona manaomia e tagata o le Atua avanoa faapea e faailoa atu ai lo latou alofa, e faamamanaina ai a latou tatalo, ma fausiaina a'e ai i totonu ia i latou se amio e faapei o le amio a le Lagi. O le tuuina mai la o ni avanoa faapea, o lea ua tuuina mai ai e le Atua i lo tatou lotolotoi tagata matitiva, o ē puapuagatia, o tagata mama'i, ma ē o loo mafatia. O i latou o le meaalofa a Keriso i Lana ekalesia. O le auala lenei, e aveesea ai e le Atua le elelee, ma faamamāina ai le auro i le faaatoatoaina o a tatou amio.

“Na sau Keriso i le lalolagi lenei ina ia savali ma galue i ē matitiva ma puapuagatia. Sa sili ona tele Lona alofa na latou maua. Ma o le taimi lenei, i Ona puapuaga i tiga o Lana fanau, o loo Ia asiasi atu ai i tagata matitiva ma lē tagolima, ma fesoasoani ai i puapuaga ma faamāmāina mafatiaga.

“A aveesea puapuaga ma manaoga o loo manaomia, o le a leai loa se auala e mafai ai ona tatou malamalama i le alofa tunoa ma le alofa o le Atua, o le a matuā leai lava se auala tatou te iloa ai le alofa mutimutivale, ma le agalelei o le Tama faalelagi. E le'i i ai lava se taimi ua sili ai ona matagofie le tala lelei nai lo le taimi e aumaia ai i nofoaga sili ona manaomia le tala lelei. O le taimi lena e susulu atu ai lona malamalama i ave sili ona manino ma sili ona malosi. O upu moni mai i le Upu a le Atua e ulufale atu i le fale o le tagata maulalo; o ave mai i le La o le Amiotonu e faamalamalamaina ai le fale maulalo o le tagata mativa, aumaia ai le fiafia i ē o mama'i ma mafatia.”<sup>3</sup>

### **Uiga lelei mai i se aiga Kerisiano**

O le mauaina o se loto alofa mutimutivale, o se uiga lelei lea e na o le Atua lava e maua mai ai. O se malamalamaaga lea e fanau mai i se olaga o le faapalepale ma le faataulagaofoina o le ola. O le faailoga masani lava lea o se tamaitiiti, talavou, poo se tagata matua foi na tausia mai a'o laititi i le aafiaga faalelagi o se aiga Kerisiano. O faigata ma tofotofoga e pasi atu ai e matua amio lelei i a latou fanau le meaalofa o se loto e masani i tiga ma mafatiaga, o se loto o le a lē fefe e faia le mea lelei ma tatalo mo se agaga o loo mafatia. Ae lē gata ai i lea, o matua alolofa e vaavaai atu i tua atu o le taimi nei ma taumafai le mea sili la te mafaia ina ia lavea'ia le la fanau mai i mafatiaga oi lumanai, o manaoga, fa'ama'i, ma mea e le'i faataunuuina e patino i le tamaititi taito'atasi. O le manatunatu la i lenei sini o le matafaioi faale-matua, o tama'ita'i talavou taitasi uma lava ma tama talavou uma lava o loo manatunatu i le faaipoipoga, e ao ona latou manatunatu i le va o tausaga o le fananau mai o a latou fanau ma le aofa'i o fanau e mafai ona latou tausia ma a'oa'oina. “E sili atu le taua nai lo se isi lava meaalofa e mafai ona ē foa'i atu i lau fanau, o le meaalofa lea o se tino maloloina, o se mafaufau atamai faautauta, ma se amio lelei. O i latou e malamalama i le mea e maua ai le manuia moni o le olaga o le a vave fo'i ona popoto. O le a latou teuina i o latou mafaufau mea sili o le olaga i a latou filifiliga o se aiga.”<sup>4</sup>

O se tamā amio Atua na te ola ma faatinoina ma faailoina i lona olaga uiga mausali o le onosai, faamaoni, galue, ma le loto tele i lana fanau. Ae o le taimi lava lea e tasi na te tuufaatasia ai lana pule ma le alofa mutimutivale, agalelei ma le alofa. E faapena, a'o fausia mausali a'e amio a le fanau, o loo faapena foi ona fausia a'e ai aafiaga lelei o le tamā i totonu o o latou loto.

I le isi itu, o le tina e lē tautala so’o (quiet) ma lē faitio a’o fai ana feau o le aiga, e faaaloalo ma alofa i lana tane ma ava i le Atua, o le a faapena foi ona ia faata’ita’iina atu se uiga alofa mutimutivale i le fanau. “Matua, agalelei ma a’oa’o malie a outou fanau, ma o le a latou a’oa’oina foi lena uiga.”<sup>5</sup>

O faaupuga o le avea ma tagata toe fuata’i e matua lē aoga lava pe afai e leai se agalelei, faapalepale, ma se alofa i le aiga.

O aso nei o tumutumuga o mea tutupu mo le aiga tagata. O tulaga e faatatau i tagata lautele i nofoaga tetele lava o le lalolagi ua matua mata’utia lava. O le mulilua, tete’aga, faitaaga, o soligātulafono a talavou, o le soona fa’aaogaina o fualaa oona, o le lē lelei o le tausiga o le tino i meaai sa’o, o le pule i le ola, ma isi mea e tele, o mea leaga nei ua matuā taia ai lava le aiga – le folasaga faavae lea o nuu ma malo.

“O loo tatou nonofo i totonu o se lalolagi o le agasala ma faaosoosoga; o loo siomia i tatou i itu uma lava e agaga o loo fano e aunoa ma Keriso, ma e finagalo le Atua ia i tatou ina ia tatou galulue mo i latou i auala uma lava e mafai ai.”<sup>6</sup>

O le galuega a le aiga, e lautele atu nai lo ona lava tagata. O le aiga Kerisiano e ao ona avea ma lesona autu, faailoa atu ai le silisili o le taua o tapulaa moni o le olaga. O totonu o le aiga e lagonaina ai le agamalu ma foliga mutimutivale o Keriso, ma o Lona loto agamalu ua tofusua uma ai lava tagata taitasi o le aiga. A’o o atu i fafo talavou mai i aiga faapea, ua tuuina atu ai foi i isi aiga lesona ia ua latou a’oa’oina. Soo se mea lava e vaaia ai, o le alofa mutimutivale e faatinoina e tosina ai agelu paia. “Latou te o mai ma viiga i o latou laugutu, ona faalogoina ai lea o se leo o viiga o loo tali mai i le lagi. O galuega taitasi uma lava o le alofa e faia ai lava musika i le lagi. E faitauina faatasi e le Tama oi le lagi le aufaigaluega lē faapito i Ana ma’ataua sili ona matagofie.”<sup>7</sup>

Ia vaaia e le lalolagi tatou te lē o faapumo’omo’oina i tatou lava i o tatou lava fiafiaga ma o tatou olioliga faalelotu, ae peitai tatou te loto foai ma naunau ia i latou ina ia latou tofusua i o tatou faamanuiaga ma o tatou avanoa taua e ala i le faapaiaga a le upu moni. Ia latou vaaia o le tapuaiga lea tatou te ta’uta’uina atu e lē tapunia pe taofia ai foi ala e agai atu i le loto, ma avea ai i tatou o ni tagata lē alolofa ma tautū i tulafono. . . . O le a tatou vaaia loa le tele o agaga ua mulimuli i le malamalama o loo susulu atu i a tatou upu ma faata’ita’iga.”<sup>8</sup>

## *Siiataga*

<sup>1</sup> *The Desire of Ages*, p. 70.

<sup>2</sup> *Ibid*, p. 73.

<sup>3</sup> *Testimonies*, vol. 7, p. 226.

<sup>4</sup> *Mind, Character, and Personality*, vol. 1, p. 177.

<sup>5</sup> *Child Guidance*, p. 218.

<sup>6</sup> *Testimonies*, vol. 6, p. 348.

<sup>7</sup> *The Desire of Ages*, p. 639.

<sup>8</sup> *Testimonies*, vol. 4, p. 59.

ASO FARAILE, TESEMA 8, 2006

# “O sē e aupito Itiiti o i Latou nei”

Tusia e Daniel S. Lee – USA

E i ai lava se taimi ou te manatua lelei lava. O le taimi lea sa faia ai se vasega o le lesona i le Aso Sapati, ma o le autu o le kuata lea sa faatatau i le aiga. E umi lava se taimi na faia ai se talatalanoaga ma le naunau tele e faatatau i le auala e a’oa’oina ai a tatou fanau e tusa ai ma faatonuga ua aumaia i le Tusi Paia ma Molimau. E foliga mai ua ausia e tagata uma se faaiuga i le manatu lea e na o matua amio-Atua lava ma a

latou faataitaiga faamaoni e mafai ai ona aumaia le fiafia moni i totonu o le aiga ma ia “a’oa’oina ai le fanau ia faapei o le matagofie o se maota” (Salamo 144:12).

Ae ui i lea, na aumaia le fesili a se tagata asiiasi o loo sau pea i le lotu, “Ioe, e lelei lava le faaupuga lea e faatatau i le tausaiaina o aiga ma ona aafiaga. Ae e faapefea fanau ia e lē o i ai ni o latou matua e vaaia i latou? O ai o le a a’oa’oina i latou? E faapefea ona latou a’oa’o pe a leai se tasi e a’oa’oina i latou?” Sa i ai se taimi na lē tautala ai se tasi ona e le’i mafaufauina e se tasi o le a fesili se isi i se fesili faapea.

Ioe, e ese le taua o le talanoa e faatatau i mea matagofie uma lava e faatatau i le aiga atoatoa lona a’oa’oina, o a’oa’oga, ma isi mataupu faapena, ae o le tele lava o taimi tatou te lē manatua ai i latou “o loo tauaso ma lē malamalama” i totonu o le tatou ekalesia ma le lalolagi.

“O loo i ai ē ua matua-oti (orphans) e ao ona tausai; ae o nisi o le a latou lē naunau e fai lenei galuega, auā o le a aumaia ai ia i latou galuega e sili atu ona tele nai lo le tele o galuega latou te manana’o latou te faia, ma laititi ai le taimi e totoe ia i latou e faamalie ai o latou lava olaga.”<sup>1</sup>

“E laititi lava si aafiaga faalelagi o loo tuuina atu i le lalolagi, ae sa tatau ona matua tele le aafiaga e maua ai e ala i a tatou faatinoga. Ua matua faula’i le taatele o ta’utinoga o tapuaiga, ae e matuā laititi lava lona moni. E mafai ona tatou fai mai o i tatou o so’o o Keriso, e mafai ona tatou fai mai tatou te talitonu i upu moni uma lava o loo i totonu o le upu a le Atua; ae o le a leai se mea lelei e faia ai mo o tatou tuaoi seivagana ua tauaveina lo tatou talitonuga i o tatou olaga i aso taitasi. Atonu e maua luga e faapei o le lagi a tatou faaupuga, ae o le a lē lavea’iina ai i tatou poo o tatou uso a tagata foi seivagana ua avea moni i tatou ma Kerisiano. O se faata’ita’iga sa’o o le a sili atu le mea na te faia mo le lelei o le lalolagi nai lo a tatou faaupuga uma lava.”<sup>2</sup>

## O le Faamasinoga

I le mataupu e 25 o Mataio, o loo ta’u mai ai le toe afio faalua mai o Keriso ma le tau i o le a tuuina atu i tagata amiroleaga ma tagata amiotonu.

Ona o le a faapotopoto “malo uma lava” i luma o le Faamasino, o tagata taitoatasi uma lava na ola i luga o le fogaeleele leni o le a manaomia ina ia talatala atu uma gaoiga sa latou faia. O le Atalii o le tagata, le Atua foafoa ma le Faaola o le vateatea atoa o le Faamasino lena i lena taimi ma o le a Ia iloiloaina olaga o tagata taitoatasi. Ae ui i lea, i leni ata, o tagata uma lava o loo aofia ai ua vaeluaina i vaega e lua; o le isi vaega ua faaigoaina o “mamoe” ae o le isi vaega ua faaigoaina o “oti.” Ua uma ona filifilia le faaiuga mo vaega taitasi ma “[o le a] fetalai atu le Tupu ia i latou o loo i Lona itu taumatau, O mai ia, outou ua faamanuiaina e Lo’u Tama, ia fai mo outou le malo na saunia mo outou mai i le faavaeina o le lalolagi” (fuaiupu 34).

Oka se tau i e matua ofo ai! Atonu ua leva ona faamoemoe tagata uma i leni faamanuiaga i lona olaga atoa. Ae peita’i a latou maua moni loa le tau i e matua sili atu nai lo mea sa latou manatu i ai, auā o le a tumau e faavavau faavavau lava.

“[I Lona afio faalua mai ma le mamalu] o le a faataunuina ai le folafolaga a Keriso i Ona so’o, ‘O le a Ou toe sau, ma Ou taliaina outou’ (Ioane 14:3). O i latou sa alolofa ia te Ia ma faatali mo Ia, o le a Ia faapaleina i latou i le mamalu ma le viiga ma le tino ola pea. O ē amiotonu o loo momoe o le a toe tutū mai nai o latou tuugamau, ma o i latou o loo feola o le a aveina a’e faatasi ma i latou ina ia fetaia’i ma le Alii i le ea. O le a latou faalogoina le siufofoga o Iesu, sili atu ona matagofie nai lo se isi lava musika ua faapea ona faalogoina i taliga o le tagata, o faapea mai ia i latou, Ua muta la outou taua. ‘O mai ia, outou ua faamanuiaina e Lo’u Tama, ia fai mo outou le malo na saunia mo outou mai i le faavaeina o le lalolagi’ (Mataio 25:34).

“E matua lelei lava ona olioli le au soo i le faamoemoe o le toe fo’i mai o lo latou Alii.”<sup>3</sup>

Ae e faapefea le vaega o loo i le itu tauagavale? “O le a Ia faapea atu foi ia i latou o loo i le itu tauagavale, O ese atu ia nai ia te A’u, outou ua faamalaiaina, i le afi e faavavau, ua saunia mo le

tiapolo ma ana agelu” (fuaiupu 41). Se eseese ina a matautia! Ou te mautinoa e leai se tasi na te fia faalogoina nei upu, e o’o lava i se miti.

“A ē tulai i luma o le nofoalii tele pa’epa’e, o le a vaaia loa au galuega e faapei ona i ai i le taimi lenei. Ua tatalaina tusi, ua faailoa mai faamaumauga o olaga taitasi uma lava. O le toatele o i latou o loo i lena vaega e toatele o tagata e lē o sauni mo mea ua faaalua mai. O le a pa’ū mai ma le maoti i taliga o nisi upu ia, ‘Fuatia i le fua, ma ua iloa ua māmāsagia.’”<sup>4</sup>

“O loo i ai tagata i le lotolotoi o tagata tausi Sapati o loo taofimauiina a latou oa faale-lalolagi. O lo latou atua lea, o latou tupua; ma latou te alolofa i a latou tupe, o a latou faatoaga, o a latou manu, ma a latou oa e sili atu nai lo lo latou alolofa i lo latou Faaola, o Lē na mativa mo i latou, ina ia faatamaoiaaina ai i latou e ala i Lona mativa. Latou te faamaualuluga i a latou oa, ma manatu e sili atu le taua o a latou oa nai lo agaga o tagata. Pe o le a fetalaiina atu ea ia i latou nei le fetalaiiga lea, ‘Le auuuna lelei e, ma le faamaoni?’ E leai; e matua leai lava. O le faasalaga e lē masuia, ‘O ese atu ia,’ o le a pa’ū mai i luga o o latou lagona ofo. Ua lē faaaogaina i latou e Keriso. O i latou o ni auuuna paie, sa latou faaputuina faamanuiaga na foai atu e le Atua ia i latou, a’o loo fano o latou uso faale-tagata i le pogisa ma le sese.”<sup>5</sup>

O le a le eseese ina i faasalaga ua tuuina atu i nei vaega e lua? O le tali e matua faigofie lava, “E moni ou te fai atu ia te outou, auā sa faapea ona outou faia i sē aupito itiiti o O’u uso nei, o A’u lea ua outou faia i ai” (fuaiupu 40).

“E silafia e Keriso Ona manaoga i manaoga o tagata puapuagatia. Sa Ia a’oa’iina Lona lava malo ona o uiga leaga sa latou faia i o latou uso a tagata. O le faatalale poo le agaleaga i tagata talitonu sili ona vaivai, ma sili ona sese, o loo Ia fetalai mai o le faia lava lea ia te Ia. Na te le’i tuua i tatou i le pogisa e faatatau i o tatou tiute, ae e masani lava ona ia toe fetalai mai lesona lava ia e ala i faatusa eseese ma malamalama eseese. Na te aveina atu i luma i latou o loo galulue i le aso tele mulimuli, ma Ia fai mai o uiga o loo faia i ē sili ona faatauvaa o Ona uso, e faamanuiaina pe faasalaina foi e faapei o loo faia ia te Ia lava. Ua Ia fai mai, ‘O A’u lea na outou faia i ai,’ poo le faapea foi, ‘Tou te le’i faia ia te A’u.’”<sup>6</sup>

### **O ai i latou nei e sili ona “faatauvaa”?**

E faapei ona aofia ai i le Faasilasilaga o le Tutoatasi o Setete Tuufaatasi le faaupuga lea, “ua foafoaina tagata uma lava ia tutusa,” o loo a’oa’o mai foi le Tusi Paia e faatatau i le taua o agaga taitasi i le silafaga a le Atua. O le a la le uiga o le upu “faatauvaa” pe “sili ona ititi” o loo aumaia ai i lenei fuaiupu? O le faaupuga “faatauvaa,” poo le “sili ona itiiti,” e lē o faailoaina mai ai le finagalo o le Atua e faatatau i se tagata ae o le manatu lava lea o tagata e faatatau i isi.

Ae faapefea pe a tatou faaaogaina le upu lea o le “leaga”? O le olaga o tagata e oti e leai lava sona saogalemua ma e tumu i mea e ofo ai; e tele mea e tutupu i le olaga o se tagata e aunoa ma le fuafuaina ma o nisi o nei mea e tutupu e aumaia ai tulaga lē lelei ia i latou. Tatou te lē masalosalo i le tausiga a le Atua mo i tatou taitoatasi pe a Ia faatagaina mea uma lava e le’i mafaufauina i le olaga mo lo tatou lava lelei. E faapei o se faata’ita’iga mai i le tele o isi faata’ita’iga, o le tasi o nei faata’ita’iga faapitoa e o’o mai i le mafaufau, o le tala lea ia Helen Keller. O se ma’i leaga lava, na ia tauaso ai, gugū, ma lē magagana ai i ulua’i tausaga o lona olaga. E ui lava i faamanuiaga e tele ma le maoa’e o mea na ausia ma faataunuina e Keller i tausaga mulimuli ane o lona olaga, ae e i ai foi le isi tagata o loo manino le pupula mai o lona igoa i tafatafa o le igoa o Keller e tutusa lelei lo la matagofie. O le igoa lea o Anne Sullivan, o lē na faaluina lona olaga atoa lava i le faamaoni, onosa’i ma le alofa mutimutivale, ina ia aumaia ai se i’uga maoa’e faapenei i le olaga o Keller.

“Ia i latou uma lava o loo latou manaomia lo tatou alofa, o le **fafine ua oti lana tane ma lē ua mātuaoti** e sili lava ona malosi o latou manaoga i o tatou lagona alofa. O i latou ia o le auga o le tausiga faapitoa a le Alii. Ua nonōina mai i latou i Kerisiano ina ia latou tausia i latou mo le Atua. ‘O lenei lava le tapuaiga mamā ma le lē pōnā i luma o le Atua ma le Tama, ina ia asiasi atu i ē ua **matuaoti** ma fafine ua oti a latou tane i o latou puapuaga, ma ia tausia o ia ia lē pona mai i le lalolagi’ (Iakopo 1:27).”<sup>7</sup>

“O loo tatou i totonu o se lalolagi o agasala ma faaososoga; o loo siomia i tatou i o tatou itu uma e agaga o loo fano e aunoa ma Keriso, ma e finagalo le Atua ina ia tatou galulue mo i latou i soo se auala lava tatou te mafai ai. Afai o i ai sou aiga fiafia, valaaulia mai i ai talavou ua leai ni aiga, i latou o loo manaomia le fesoasoani, i latou o loo faanaunau mo le alofa mutimutivale ma upu agalelei, mo le faaaloalo. Afai e te naunau ina ia aumaia i latou ia Keriso, e ao ona e faailoaina lou alofa ma lou faaaloalo mo i latou o ē na faatauina i Lona toto.”<sup>8</sup>

## *O le tele lava o taimi tatou te lē iloa o i latou o loo manaomia le tatou fesoasoani atonu o loo i tafatafa lava o i tatou!*

### **O le faaitaiga a lo tatou Faaola alofa mutimutivale**

I Petesa, na vaaia ai e lo tatou Faaola se tagata ma’i sa matuā sili ona leaga lona tulaga. O se tagata lea sa pipili i tausaga e 38. O lona ma’i o le iuga lea o lana lava agasala, ma sa manatu i ai o se faasalaga lea mai i le Atua. O le tuua to’atasi o ia e aunoa ma ni uo, ma ua ia manatu ai ua lafoa’ia o ia mai i le alofa tunoa o le Atua, na tele ai ni tausaga uumi o le faanoanoa na ola ai lenei tagata.”<sup>9</sup>

O le a le mea na faia e le Faaola i lenei tagata puapuagatia?

“Na fetalai atu [Iesu] ia te ia, E te fia malolo ea? . . . Ina tula’i ia, ave lou moega, ma savali. Ma o le taimi lava lena na faamaloloina ai lea tagata, ma na ia avea loa lona moega, ma savali” (Ioane 5:6, 8, 9).

I le ala i le fale o Iairo ina ia faamalolo i lona afafine, “na fetai’i ai Iesu i totonu o le lotolotoi o le motu o tagata ma se fafine mativa sa puapuagatia i tausaga e 12 i se faama’i sa avea ai lona olaga o se avega. Sa ia faaaluina uma lava ana tupe i foma’i ma vailaau, a ua na ona latou ta’uina mai ia te ia e leai se fofu o lona ma’i. Ae peitai na toe faafouina lona faamoemoe ina ua ia faalogo i faamalologa na faia e Keriso. Na ia matua mautinoa lava a mafai lava ona ia alu atu ia te Ia, o le a faamaloloina o ia. O le vaivai ma le mafatia tele na ia sau ai i tafatafa o le sami lea sa a’oa’o ai Iesu, ma taumafai loa ina ia faaofiofi atu i totonu o le motu o tagata, ae na lē mafai. Ona ia toe mulimuli atu foi lea ia te Ia mai i le fale o Levi-Mataio, ae na lē mafai lava ona ia o’o atu ia te Ia. Ona amata lea ona ia faanoanoa, ae i le maliu atu o Iesu i le lotolotoi o le motu o tagata, na Ia fa’alatalata ane ai i le mea sa ia i ai.”<sup>10</sup>

O le faatuatua na pa’i atu ai le fafine i le ofu o Keriso ona faamaloloina ai loa lea o lona ma’i i lena lava taimi. A’o ia alu ese mai i le motu o tagata, e le’i finagalo le Faaola alofa mutimutivale e tuu atu o ia e alu e aunoa ma le mautinoaga faamanuiaina ma fetalai atu, “Lo’u afafine e, ua e ola i lou faatuatua; alu ia oe ma le filemu, ma ia ē malolo i lou ma’i” (Mareko 5:34).

“O Iesu o Ia o le foma’i faamalolo o le tino e faapena ai foi ma le agaga. Na ia naunau i ituaiga mafatiaga uma lava na ia silafia, ma na ia aumaia le faamalologa i tagata puapuagatia uma lava, o Ana upu agalelei sa i ai le vailaau faamalolo. E le’i i ai se isi na mafai ona faapea mai na Ia faia se vavega, ae peita’i o le amio lelei – le mana faamalolo o le alofa – na alu atu i fafo nai ia te Ia i tagata mama’i ma puapuagatia.”<sup>11</sup>

“Soo se mea lava na Ia alu i ai, na muamua atu lava tala e faatatau i Lona alofa. I nofoaga sa ia pasi atu ai, sa olioli ai i le ola maloloina i latou na faamaloloina e Lona alofa mutimutivale, ma faaaogaina ai loa o latou malosi fou ua maua. Na lolofi mai tagata e toatele ina ia faalogo mai i o latou laugutu i galuega na faia e le Alii. O Lona siufofoga o le leo (sound) muamua lava lea ua faalogoina e le toatele, o Lona suafa o le upu muamua lava lea ua latou tautala ai, o Ona fofoga foi o le foliga muamua lava lea ua latou ulua’i vaai i ai. Aisea e lē tatau ai ona latou alolofa ia Iesu, ma usuina Ona viiga? A’o ia pasi atu i taulaga ma aai sa faapei o Ia o se galu malosi o le ola, tuuina atu ai le ola ma le olioli i soo se mea lava na Ia afio atu i ai.”<sup>12</sup>

E o’o lava i le taimi a’o avea o Ia ma talavou, “o Iesu o Ia lava o le vaipuna o le alofa faamalolo mo le lalolagi; ma o nā tausaga uma lava o le nofo ese i nofoaga tuufua i Nasareta, sa tafe atu Lona olaga i

galu o le alofa mutimutivale ma le agalelei. O tagata matutua, o ē faanoanoa, ma i latou na faapologaina e le agasala, o le fanau i a latou taaloga i lo latou olioliga tonu, o tama'i manu iti o le vao, o manu ave avega onosa'i – sa sili atu ona fiafia i latou uma ona o Lona faatasi ma i latou. O Lē o loo faatumauina lalolagi uma e le mana o Lana upu, e fiafia foi e fesoasoani i se manulele ua manu'a. E leai se mea e lilo i Lana silafaga, e leai se mea na Ia inoino e auauna i ai.”<sup>13</sup>

### **Ae e faapefea i tatou?**

Poo le a lava le tatou filifiliga, o loo siomia lava i tatou e se lalolagi ua tumu i mafatiaga, ma'i, tiga, ma puapuaga. O iuga o le agasala o loo ta'atia mai e faapei o se mā'ila i soo se mea lava i luga o le fogaeleele. Ae e ui lava ina faapei le olaga o le tulaga moni lava o loo fai mai ai Iopu, “ua fanau mai le tagata ia tigaina, e faapei ona a'e i luga o aloiafi” (Iopu 5:7), o loo toatele lava tagata o loo sili atu ona puapugatia moni lava nai lo isi. O i latou nei e manaomia le tatou fesoasoani.

Ae e ese le tele o taimi tatou te lē iloa ai o i latou o loo manaomia le tatou fesoasoani atonu o loo i tafatafa tonu lava o i tatou! O tatou pupū ea o tatou loto i mea o loo tatou naunau i ai, matafaioi, ma sini ua tatou lē iloa ai i latou nei? Afai ua tele tele a tatou galuega ma matafaioi ua lē mafai ai ona tatou tali atu i nā manaoga, o loo tatou misia se mea sili ona taua i le olaga. Tusa lava poo le a le ituaiga tofiga atonu o loo tatou umia poo le a foi le tele o mea ua tatou faataunuaina, afai tatou te faatalale i lenei vaega sili ona taua, ua lē aoga a tatou galuega lelei uma lava ma e sili ai, atonu ua tatou misia le uiga moni lava e mafua ai ona tatou ola.

Ua apoapoa'iina i tatou ina ia tatou “mataala ma le faaeteete, ma le tatalo, ma le potu, ne'i faatumuina le mafaufau i le tele o galuega taua faapisinisi ma ua lē amanaia ai le amio Atua moni ma tafieseai ai le alofa mai i le loto, e ui lava i le manaoga tele o le avea o oe ma lima fesoasoani o le Atua i ē tauaso ma isi tagata uma lava o loo i se tulaga mafatia. O tagata sili ona tuua toatasi ma lē amanaiaina o i latou nā e sili ona manaomia le fesoasoani. Faaoga lou taimi ma lou malosi e te a'oa'o ai ina ia “finafinau lava lou loto,” ina ia faamaoni i mea uma lava, ma ia fiafia i le alofa, ‘ma auauna ai i le Alii.’ Manatua fai mai Keriso, ‘Auā na faapea ona outou faia i sē aupito ititi o O'u uso nei, o A'u lea ua outou faia i ai.’

“E mana'o le Atua i Ona tagata ina ia sili atu lo latou alofa ma manatunatu i tagata puapugatia nai lo i latou lava . . . E manaomia e le Atua ina ia tutusa lo tatou alolofa i le fafine ua oti lava tane ma ē ua matua oti ma ia faapena ai foi ma tagata tauaso ma i latou o loo puapugatia i isi tulaga faapena o le lē atoatoa o le malosi o le tino. O le alofa lē faapito ua seāseā maua i lenei tupulaga o le lalolagi . . . O se tulaga uiga ese tele le lē amanaiaina e tagata o loo tautino mai o i latou o Kerisiano o a'oa'oga manino ma le tonu a le Upu a le Atua ma latou lē lagonaina ai se salamo i o latou mafaufau. Ua tuu mai e le Atua i luga ia i latou le matafaioi o le tausia o tagata mama'i,' tauaso, pipili, o le fafine ua oti lana tane, ma lē ua aumatuā; ae e toatele latou te lē faia se taumafaiga ina ia usitai i lea faatonuga.

“E matua tele lava se galuega e ao ona faia i totonu o lo tatou lalolagi, ma a'o tatou latalata atu i le tapunia o le talaaga o le lalolagi, e lē o faaititia ai i se tulaga ititi lava; ae peitai a i ai loa i totonu o le loto le alofa atoatoa ona lelei o le Atua, o le a faia loa mea sili ona matagofie.”<sup>14</sup>

Atonu e fai mai nisi, “Ua ou fiu i lo'u fesoasoani i tagata. E leai se i'uga o le fesoasoani!” O loo i ai nisi atonu sa latou fesoasoani i isi i a latou taumafaiga sili lava, ae latou te faavaivai i nisi o taimi i a latou galuega auā latou te le'i vaaia se iuga tele. Ae se'i tatou manatunatu lava mo sina sekone. O le a le iuga moni o a tatou gaioiga? O le faamalieina ai ea o lo tatou fia tagata fia faalialiavale ma le faamaualuga ma ia maua mai ai se mea ina ia ta'uleleia ai i tatou i luma o le Atua ma tagata? E ui lava ina atonu sa tatou matua galulue lava ina ia manumaloina mai ni agaga, e ao ona tatou lē faagaloina le mea moni, e leai se fatu e fua mai ai se seleselega i se po e tasi. E matuā tele le taimi, le mataala, ma le onosai seia o'o ina seleseleina. E faapena foi, e faapena foi le galue i agaga/tagata.

“Atonu e mafai ona ē faapea mai ua aveina atu oe ma ua foa'iina atu au mea i luga ia i latou e lē aoga i ai lou alofa, ma ua ē faavaivai ai i lou taumafai e fesoasoani i tagata mafatia. Ou te tuuina atu Iesu i ou luma. Na Ia afio mai ina ia lavea'i i le tagata ua pa'ū, ina ia aumaia le faaolataga i Lona lava malo; ae

latou te le'i taliaina o Ia. Sa latou inoino ma faatauemu i Lona alofa, ma latou fasiotia ai o Ia o Lē na afio mai mo le foa'iina atu ia i latou o le ola. Na liliu ese ea lo tatou Alii mai i le aiga tagata pa'ū ona o lenei uiga faatauemu? E ui lava ina lē manuia au taumafaiga mo le lelei e tusa ma le 99 pasene, ma e na o le faatauemu ma le aamu, ma le inoino na ē maua, ae afai e faamaonia le manuia o lau taumafaiga **lona selau**, ma lavea'iina ai se agaga, oka, se manumalo matagofie ua ē maua! O le agaga e tasi ua se'ia mai nai le lima o Satani, o le agaga e tasi ua faamanuiaina, le agaga e tasi ua faamalosia. O lenei manumalo o le a totogiina fa'aafe ai oe mo au taumafaiga uma lava.”<sup>15</sup>

### “Outou ua faamanuiaina e Lo'u Tama”

Ua matua puupuu lava le taimi o le alofa tunoa. O loo pasi atu avanoa. O tatou faatali ea mo le *taimi sa'o* ma seiloga e *lava tupe ma mea e maua* ina ia fesoasoani ai i isi? Afai tatou te lē totōina le fatu i le taimi e fua ai laau (spring), o le a tatou lē mafai foi ona selesele i le taimi e selesele ai.

“A'o outou manatunatu i lo outou ola e faavavau, ia outou ala mai nei, ma amata ona lulu fatu lelei. O le mea e te lūlūina, o le mea foi lena o le a ē seleseleina. Ua sau le seleselega – le taimi tele o le seleselega, le taimi o le a tatou seleseleina ai le mea sa tatou luluina. O le a leai se mea e ma'imau i le faatoaga; e matuā mautinoa lava le seleselega. O le taimi lenei o le luluuga. Amata nei taumafaiga ina ia mauoa i galuega lelei, 'ia sauni e tufatufa atu, naunau e tautala atu,' ma teuina ai mo outou se faavae lelei e puipuia ai mo le taimi o le a o'o mai, ina ia outou 'taofi mau atu i le ola e faavavau.' Ou te ole atu ia te outou, lo'u au uso e i nofoaga uma, ia outou lafoa'i ese lo outou uiga lē alofa. Ia faamalosia i totonu ia te outou se fiafia i le uiga o le tausi ma fafaga atu i isi, o se uiga fiafia ina ia fesoasoani ia i latou e manaomia le fesoasoani.”<sup>16</sup>

Tau ina ia faamanuia mai le Alii ia i tatou ina ia mafai ai ona tatou tutū i Lona itu taumatau ma faalogo atu ia te Ia o faapea mai, “O maia, outou ua faamanuiaina e Lo'u Tama, ia fai mo outou le malō na saunia mo outou mai i le faavaeina o le lalolagi: Auā sa ou fia ai, ona outou aumai lea ia te a'u mea ou te 'ai ai: Sa ou fia inu, ona outou avane lea ou te inu ai: Sa fai a'u ma tagata ese, ona outou talia mai lea o a'u: Sa ou lē lavalavā, ona outou fa'aofuina lea o a'u: Sa ou i le fale puipui, ona outou o mai ai lea ia te a'u.”

### *Siiataga*

<sup>1</sup> *Testimonies*, vol. 2, p. 27.

<sup>2</sup> *Christ's Object Lessons*, p. 383.

<sup>3</sup> *The Acts of the Apostles*, p. 34

<sup>4</sup> *Child Guidance*, pp. 568, 569.

<sup>5</sup> *Counsels on Stewardship*, p. 123.

<sup>6</sup> *Welfare Ministry*, p. 23.

<sup>7</sup> *Testimonies*, vol. 6, p. 281.

<sup>8</sup> *Ibid.*, p. 348.

<sup>9</sup> *The Desire of Ages*, p. 202.

<sup>10</sup> *Ibid.*, p. 343 (Emphasis supplied).

<sup>11</sup> *Ibid.*, p. 92.

<sup>12</sup> *Ibid.*, p. 350.

<sup>13</sup> *Ibid.*, p. 74.

<sup>14</sup> *My Life Today*, p. 243.

<sup>15</sup> *Testimonies*, vol. 2, p. 31.

<sup>16</sup> *Ibid.*

# Mauaina o i latou e lē'i aapa atu i ai

Tusia e Daniel Campodonico – Italy

**L**a outou o atu i le lalolagi uma, ma tala'i atu le tala lelei i tagata taitasi uma lava” (Mareko 16:15) o le faatonuga lea a le Alii i tagata talitonu uma lava. O lenei tala lelei e faavavau e ao ona laugaina ma le mana “ia i latou o loo nonofo i le lalolagi, ma malō uma, ma gagana, ma nuu, ma tagata” (Faaaliga 14:6). E tatau ona o’o atu i tulimanu uma o le lalolagi” (Galuega 1:8), faamalamalamaina ai le lalolagi i Lona pupula, ma avea ai ma “molimau i malo uma; ona o’o mai ai lea o le gataaga/iuga” (Mataio 24:14).

O le auala e tauaveina ai i luma le faatonuga a le Alii e aoga ma manaomia ina ia laugaina le tala lelei e faavavau, le upu moni mo le taimi lenei, le tala lelei i malo uma lava, o ituaiga, ma tagata. E ao ona tala'iina i gagana uma lava o loo i ai i le lalolagi lenei ma tulimanu uma lava o le lalolagi. Ae o le a le telē o le sini i le taimi lenei o le faatonuga a le Alii?

## O le lalolagi

O le taimi lenei ua ova atu ma le 6.4 piliona le fuaitau aofai o le lalolagi. O sekone taitasi uma lava e 4.11 tamaiti (e ova atu ma le 129,880,000 i le tausaga e tasi) e fananau, ae e 1.7 tagata e maliliu i sekone taitasi uma lava (e ova atu ma le 56,590,000 i le tausaga). O lona uiga o le fuaitau aofa'i o tagata faatupulaia i tausaga taitasi uma lava e tusa ma le 73,480,000 tagata. O lona uiga, i le Vaiaso o Talosaga e tasi lenei, i nei aso e sefulu, ua faateleina ai le aofai o le fuaitau aofai o tagata i le 2,013,000 tagata ma afai tatou te faatali mo le isi tolu aso e sosoo ai, o le a lava lelei le toatele o tagata e faatumuina ai se isi Roma (malō o Roma).

Ua vaevaeina le lalolagi i malo tutoatasi e 193 faaopoopo i ai ma laueleele e lē'i tutoatasi e 70 ma isi malō. Ae o loo i ai foi le tele o le afe o gagana eseese e tautala i le sili atu ma le 6,800 gagana. I nei gagana e sili atu ma le 200 gagana o loo tautala ai tagata e tusa ma le miliona pe sili atu foi, a'o le 27 o ia gagana e tusa ma le 50,000,000 tagata o loo tautala ai.

E afe ma afe tapuaiga o loo i le lalolagi ma e sili atu nai lo le 67% o le fuaitau aofa'i o le lalolagi e lē o ni Kerisiano. O lona uiga e sili atu nai lo le 4.3 piliona tagata e lē o ni Kerisiano.

Ae sili ai nai lo lena, o le eseese o a'oga, galuega, mauoa ma le matitiva, o tulaga eseese o tagata i nuu ma malo, o o latou tausaga, tane poo fafine, ma mea faapena, o loo vaevaeina ai le fuaitau aofa'i o le lalolagi i vaega eseese e afe ma afe.

O nei faamatalaga uma ua faailoa mai ai le lu'iga tele lava o loo tatou fetaia'i ina ua tatou taliaina le faatonuga a le Alii ina ia tala'i “i tagata uma lava.” O lona uiga i le taimi lenei, o le tala'i atu lea i tagata e 6.4 piliona. Tatou te manaomia foi ina ia tatou manatunatu i le mea moni lea, o aso taitasi uma lava e tusa ma le 155,000 tagata e feoti ma e afe ma afe le toatele o tagata latou te le'i maua lava le avanoa taua e faalogo ai i le upu moni mo le taimi nei. O le isi itu, o aso taitasi uma lava e tusa ma le 355,000 tagata e fananau ma latou te manaomia ina ia latou faalogo i le tala lelei e faavavau.

Ina ua faato'a tula'i mai le Faagaioiga Toe Fuata'i, toetiti lava a o'o i le 2 piliona le fuaitau aofa'i o tagata o le lalolagi, ma sa tele le galuega sa tatau ona faia. O le taimi nei ua tatou fetaia'i ai ma se lu'iga sili atu ona telē ma o taeao o le a sili atu ai ona matuā telē. E puupuu tele le taimi o le alofa tunoa. O aso taitasi uma lava e pasi atu o le tasi foi lena o le aso ua faaititia e galue ai.

## **O i latou e le'i o'o atu i ai le tala lelei**

E le'i o'o mai le i'uga, e le'i sau foi Iesu lo tatou Faaola alofa, auā e le'i faataunuuina atoatoa Lana galuega. O le a le mea e mafai ona tatou faia ina ia faavaveina ai “le o'o mai o le aso o le Atua” (2 Peteru 3:12), ina ia fetaia'i ma le Tupu o tupu, ma le Alii o alii” (Faaaliga 19:16)? E ao ona tatou faataunuuina le faatonuga a le Alii ina ia o'o atu ai le tala lelei ia i latou e le'i faalogo! . . . ae peitai, o ai i latou e le'i o'o atu i ai le tala lelei?

## **Malō ma atunuu e le'o tutoatasi**

E tusa e 120 atunuu e lē o i ai se tagata ekalesia e toatasi a le tatou Faagaioiga. O Iceland ma Albania i Europa, o Morocco ma Gabon i Aferika, o Iraq ma Taiwan i Asia, o Cuba ma Grenada i Amerika i matū, Palau ma Micronesia i le Pasefika, ua na o ni nai faata'ita'iga laititi na. I isi malō ma atunuu o loo ua i ai nei le Faagaioiga Toe Fuata'i ae to'aititi lava ona tagata ekalesia ma o nisi o nei atunuu e lē o i latou o ni tagata moni o nei atunuu ae o ni tagata faimalaga mai i fafo. O lona uiga o loo manaomia pea lava le faatupulaia o le galuega faamisionare.

## **Atunuu eseese ma tagata.**

O loo i ai pea le afe ma afe o ituaiga gagana eseese ma tagata e ao ona tala'iina atu i ai le tala lelei e faavavau, e faapei o tagata Inuit ma Black-feet i Amerika i matū, Guajiro ma Yanomami i Amerika i Saute, Sami ma Komi i Europa, Tuareg ma Nuba i Aferika, Hazara ma Hani i Asia, Chamorro ma Yapese i le Pasefika, ma isi atunuu e tele.

## **Gagana**

O loo tatou lomina i taimi uma tusitusiga i gagana e tusa ma le 80-90 o gagana e 200 o loo tautala ai tagata e 1 miliona pe sili atu foi. Ae e lē taitai afa ai le fuainumera o tagata! Ae lē gata i lena, o loo i ai gagana o loo tautala ai se vaega laititi o tagata e tataua ona tala'i i ai.

## **Tagata**

E piliona ma piliona tagata o loo faatali ina ia faalogo i le upu moni mo le taimi lenei, ma o aso taitasi uma lava e afe ma afe le toatele o tagata o loo feoti e aunoa ma lo latou mauaina o lenei avanoa taua. Ia i latou ia o loo i ai tane ma fafine, tamaiti, talavou, tagata matutua, o i latou e lē'i a'o'oga (e tusa ma le 780 miliona), tamaiti a'oga, faiaoga, o polofesa, tagata atamamai faalemafaufau, saienitisi, tagata o soo se a'oa'oga (musika, tusi tala, tagata o tifaga, ma isi), tagata taaalo, faifaatoaga, tane faipisinisi, o pule o fale faigaluega, o loia, faamasino, o tagata faapolokiki, fomai, fitafita, tagata femalagaa'i, tagata tafafao, o tagata mai i isi atunuu, tagata mauoa, matitiva, tagata ulaula, tagata mama'i i le faama'i oti (HIV) tagata e lē mafai ona ola e aunoa ma lo latou faaaogaina o fualaau oona, o tane taliavā ma fafine talitane, o talavou soli tulafono, tagata solitulafono ma pagota, o tagata lē faigaluega, o i latou ua lē toe faigaluega ona ua matutua, tagata mama'i. O loo i ai foi tagata Katoliko, Porotisano, o talitonuga lautele, Anglicans, Musalemi, Hindus, Buddhists, Sikhs, Jews, o i latou e lēai ni talitonuga pe lē talitonu foi i le Atua, ma isi faapena. O fea e mafai ona tatou maua ai i latou? Soo se mea lava. Atonu o le tasi o i latou o lou tuaoi lea.

Ae peitai e faapefea ona mafai e se ekalesia laititi, e faapei o le Faagaioiga Toe Fuata'i, ona aumaia le tala lelei ma avea o se molimau, “i tuluiga uma lava o le lalolagi,” ma maua ai i latou e le'i o'o atu i ai le tala lelei? Se'i tatou vaai lava i ni nai faata'ita'iga mai i le Tusi Paia.

## **Faata'ita'iga mai i le Tusi Paia**

I le Tusi Paia o loo tatou maua ai le tele o faata'ita'iga o auala na mafai ai ona maua e le au talitonu i latou e le'i o'o atu i ai le tala lelei ma le saunia o le ala e le Atua. Se'i tatou vaavaai lava i nisi o nei auala ina ia tatou iloa ai pe faapefea ona mafai e ni tagata toaititi matata'u i le Atua ona ausia vaega eseese

o tagata, o le tele o le afe ma afe o tagata, ma faasusuluina atu ai le malamalama e faatatau i le Atua soifua, e faatatau i Lana upu moni ma Lona alofa.

### **Atunuu, tagata, ma vaega eseese o tagata**

O se tagata mauoa, Aperaamo, o lē na avea ma tagata faimalaga solo, sa ia lauga atu i malo o Kanana ma o ana fatafaitaulaga o molimau gugū ia mo Ieova. O so’o o Iesu ma Paulo, lē sa sauāina muamua tagata o le Atua, na latou faasalalauina ma le mana le tala fiafia ma “suia ai le lalolagi” (Galuega 17:6). O a latou upu ma tusitusiga na o’o atu i tagata Iutaia, Roma, Kalatia, Maketonia, Eleni, ma isi tagata e toatele ma gagana e tele. O o latou vae na aveina atu ai i latou i le tele o atunuu mamao. O le latou faaunauga tele e tasi o le laugaina lea o le tala lelei i nofoaga e le’i faalogo muamua lava ia Keriso (Roma 15:20). E le’i umi ae faatumuina loa le malo o Roma i tagata talitonu ia Iesu, e o’o lava i totonu o le “maota o Kaisara” (Filipi 4:22).

### **O Tupu**

O Iosefa, o se pagota ma se pologa talavou, o Tanielu, o se tamāli’i na ave na tuliese, O Eseta, le masiofo Iutaia o le Malo o Peresia, Neemia, se tagata faigaluega faamoemoeina – o i latou nei sa latou faailoaina atu uma i tupu o le lalolagi le Atua soifua e toatasi. O nisi o nei tupu na latou faia **tulafono** ina ia “viia ma faamamaluina ma ia ifo ai i le Tupu o le lagi” ma na tuuina atu i tagata uma, malo, ma gagana, o loo nonofo i le lalolagi uma” (Tanielu 4:37, 1). O le iuga, na “avea ai le tele o tagata o le laueleele ma tagata Iutaia” (Eseta 8:17).

### **Faifeau, aufaigaluega o le malo, fitafita**

Na faailoa atu e se auuna teine laititi le auuala e mafai ai ona maua e le kapeteni malosi o Suria le faamalologa ma le Atua foafoa. O fitafita eseese o Roma e faapei o le ta’ita’i au o le to’a selau o Kapanaumi, o tagata Iutaia na auina mai e molia Iesu i le aso mulimuli o le Faiga’ai o Faleapitaga, o Konelio i le Galuega e 10, ma le tagata sa leoleoina le falepuipui i Filipi, sa matuā aafia uma lava i latou i upu o le ola na faalogoina mai ia Iesu, Peteru, ma Paulo. Manatua foi le suikonesula o Sekio Paulo i le motu o Kuperu (Cyprus, Galuega 13:7), ma le auuna sili a Kanake, le tupu tama’ita’i mai i Aitiope. Manatua foi Sakaio, le alii mauoa o le au telona. O i latou uma lava nei sa tatalaina ma le fiafia o latou loto ma latou talitonu o “Iesu Keriso o le Alo lea o le Atua” (Galuega 8:37).

### **Faitaulaga ma ta’ita’i fa’ale-lotu**

I le auunaga a Iesu ma le galuega faamisionare a so’o, sa fetaia’i ai so’o talitonu ma tagata Iutaia ma tagata faapaupau, tagata o sa Levi, ma isi ta’ita’i faale-lotu. O isi taimi sa latou molimau ai mo le upu moni i luma o le Fono sili a le malō o Iutaia (Sanhedrin) e faapei ona faia e Setefano. Fai mai le ripoti a Luka “o se vaega tele lava o le au faitaulaga sa usita’i i le faatuatua” (Galuega 6:7).

### **Tagata a’oa’oina faalemafaufau, galulue i soo se galuega i tomai o le mafaufau**

O le a se mea na osofia ai le lagona i tagata popoto mai i Sasa’e ina ia o mai e ifo i le Pepe faato’a fanau mai ma aumai ia te Ia a latou meaalofo taua? Na tatalaina e le Tusi Paia o latou mata i se valoaga anamua! Vaavaai foi i le aposetolo o Nuu ese i luga o Mauga o Mara (Galuega 17:22) o faailoa atu le Alii o le lagi ma le lalolagi, le Faaola ua soifua mai, i tagata faapaupau popoto i a’oa’oga eseese o Atenai. Ae sa i ai foi tagata popoto e faapei o Luka, se foma’i pele, ma Sosene le loia, Litia lē faatau ie paauli, ma tagata fai faleie o Pisila ma Akuila na mauaina i le feau o le alofa tunoa. Maitau mai mulimuli ane, na faamatalaina mae’ae’a ai e tagata fai faleie nei o Pisila ma Akuila le ala o le Atua ia Apolo le tagata a’oa’oina ma le poto i tautala. O loo ta’u mai e Paulo le galuega faamisionare a nei tagata: “O o’u fesoasoani ia Keriso Iesu . . . o i la’ua nei e le gata ina ou tuu atu i ai le faafetai, ae faapena ai foi ekalesia uma lava o Nuu Ese” (Roma 16:3, 4).

## **Fafine**

O le fa'alafiina o ia mai i faufauga leaga a Aapo, le tupu amioleaga, na auina atu ai Elia i se fafine faapaupau i Sarefata, o se fafine sa ia iloa o ia (Elia) o le tagata o le Atua. O le tele o tausaga muamua, o Ruta, se auauna fafine faapaupau mai Moapi, na avea o ia ma tagata talitonu ia Keriso e ala atu ia Naomi, le tagata sulufa'i mai i Isaraelu, ma na faamanuiaina o ia e ala i le avea o ia ma tupuga o Keriso. E tele fafine na taliaina le tala lelei, ma o loo ta'u mai ai foi e toatele sa'o tama'ita'i na talitonu (Galuega 17:4). E le gata ina valaauina fafine amio lelei e faatasi atu i le malō o le lagi ae faapena ai foi ma fafine agasala (fafine talitane, mulilulua, ma fafine faapena). Fai mai le fetalaiga a Iesu i ta'ita'i o Iutaia "E moni ou te fai atu ia te outou, . . . e muamua atu fafine talitane i le malo o le Atua ia te outou. (Mataio 21:31), auā "na talitonu fafine talitane" (fuaiupu 32) i le tala'iga a Ioane le Papatiso. I Lana auunaga, o fafine o lenei vasega inosia sa tali atu i le upu o le alofa. Vaai foi i le fafine o Samaria, o lē na avea ma misionare i tagata o lona aai, ma Maria Makatala, le fafine agasala, o lē na muamua lava vaai ia Iesu i lona toe soifua mai, ma aumaia ai tala lelei i le au so'o faavaivai. O loo i ai foi Raava, le fafine talitane o Ieriko, o lana gaioga o le agalelei ma le faatuatua, o loo manatuaina i le tusi o Eperu ma na faaolaina o ia e tagata asiasi o Isaraelu (spies). Na ia maua foi le avanoa taua o le avea o ia ma tupuga o Keriso.

## **Fanau ma Talavou**

Ina ua fa'asāina tinā e le au soo mai i le aumaia o a latou fanau ia Iesu, na faatonu atu le Alii ia i latou, "Tuu mai o tamaiti e o mai ia te A'u, aua tou te vavao ia i latou: aua e faapei o i latou nei le malō o le Atua" (Luka 18:16). O le tala lelei foi e mo talavou foi. O le tasi o talavou na taliaina le tala lelei o Timoteo lea, lea na tusia i ai faapea "Aua ne'i inoino se tasi i lou talavou; a ia fai oe ma fa'aa'oa'o o ē talitonu, i upu, i talanoaga, i le alofa, i uiga, i le faatuatua, i le amio mamā." (1 Timoteo 4:12).

## **Tagata Matitiva ma Tagata Mama'i**

Fai mai Iakopo "O le Tapuaiga mamā . . . o lenei, ia asiasi atu i ē ua aumatuā ma fafine ua oti a latou tane i o latou puapuga" (Iakopo 1:27) fai mai foi le a'oa'oga a Isaia, "Foi atu lau meaai i lē ua fia ai . . . aumai le tagata mativa . . . i lou fale . . . a ē vaai atu i lē ua lē lavalavā, faaofu ia te ia" (Isaia 58:7). O le tasi tagata talitonu mai i le aai o Iopa o se tagata fesoasoani tele ma o se uo a tagata matitiva. O ia lenei o Tapita, o lē na toe faatuina mai nai le oti. O le faamaloloina o tagata mama'i o se vaega taua lenei o le auaunaga a Iesu. I totonu o le Tusi Paia tatou te maua ai le tele o faata'ita'iga faatinoina o auaunaga fesoasoani i tagata mama'i.

## **Pologa ma tagata solitulafono**

I tusi o loo i le Feagaiga Fou tatou te maua ai le tele o faamatalaga e faatatau i pologa poo auauna o loo faailoa mai ai sa tala'iina atu foi ia i latou le tala lelei. O le tasi o i latou, o le tusi lea ia Filemoni, sa tusia mo se pologa na liua e ala i le tala'iga a Paulo. O le tala lelei e mo tagata solitulafono foi. A'o maluu Iesu ina ia lavea'i i tatou, na Ia faailoa atu le alofa i le tagata solitulafono lea na faato'a liua lava i luga o le satauro.

## **O le tatou manaoga ina ia maua i latou e le'i o'o atu i ai le tala lelei.**

O faata'ita'iga o loo i luga e ao ona osofia ai i tatou ina ia tatou galulue, ina ia faasalalau le tala lelei i soo se mea. Ae peitai o le a le mea tatou te manaomia ina ia mafai ai ona tatou tauaveina lenei galuega, e ese mai i lo tatou alofa loloto mo tagata agasala? Afai tatou te vaavaai ifo i le tulaga o loo tatou i ai, tatou te vaaia ai e matuā umi lava le lisi o o tatou manaoga. Se'i tatou manatunatu lava i mea nei o loo mulimuli mai:

## **Mana**

O le avea ma molimau mo Keriso i tuluiga uma lava o le lalolagi, e ao ona tatou maua le mana e na o le Agaga Paia lava e mafai ona tatou maua ai. O Lana galuega o le “faailoa atu lea i le lalolagi le agasala, ma le amiotonu, ma le faamasinoga” (Ioane 16:8), ina ia ta’ita’i, ma tatala le ala mo le tala lelei, inia foa’i mai meaalofoa, ma fesoasoani i tagata talitonu ina ia fua mai i fua e tele. E aoga ma e taua tele lo tatou faalogo i Lona siufofoga/leo ma faataga o Ia ina ia galue e ala atu ia i tatou.

## **Meafaigaluega Faale-tagata**

O tagata talitonu taitasi uma lava, ua fanau mai o ia ina ia avea ma misionare, ma faasusuluina le malamalama o le Tala Lelei i lona olaga ma ana amioga ma ana upu, ma faailoa mai ai o ia o se tagata fou ia Iesu. O le a ia manatu o tagata uma lava o se atalii poo se afafine lea o le Atua, o se tagata agasala o loo manaomia le mana faaola o Iesu e ui lava i le eseese i atunuu eseese, gagana, aganuu, ma eseese faapena. Ioe, e ao ona faia lenei galuega e tagata faigaluega o le Tusi Paia, toeaia, ma faifeau/auauna. Ae o lenei galuega e lē mo na o i latou. O talavou laiti uma lava, tamaiti a’o’oga, fafine, tagata faigaluega o le mafaufau, aemaise ai le afaigaluega i matata eseese o loo i ai se latou laufanua lautele lava faamisionare o le galuega, auā e mafai ona latou faia se galuega faapitoa e lē mafai ona faia e ni misionare galulue faasoloatoa. O le tala’i/lauga i soo se nofoaga lava e le’i o’o muamua lava i ai le tala lelei ma ulufale atu i laueleele fou, e ao ona avea lea ma naunautaiga o i tatou uma. O le faia o lenei galuega, o nisi o taimi e aoga ai le a’oa’oina o gagana, fa’amasani i laueleele fou, atonu ia puapuagatia ai i le fia ai/inu ma mea faapena, ma o le tele lava o taimi ia sauni foi ina ia foa’iina atu lou ola mo Iesu. E na o le taliaina lava o nei tulaga faigata e mafai moni ai lava e le au talitonu ona avea ma misionare o le a manumaloina mai agaga fou. Ma o a latou faata’ita’iga o le a latou osofiaina ai isi ina ia tuuina atu i latou atoatoa i le auaunaga.

## **A’oa’oga, faatonuga, ma koleniga**

O A’oa’oga, faatonuga, ma koleniga mo le galuega faamisionare o vaega faavae uma lava ia. O kamupani taitasi uma lava ma ekalesia taitasi uma lava e ao ona avea ma nofoaga tutotonu e a’oa’oina ai e mafai ona a’oa’o ai i le laugaina o “Iesu Keriso, o Lē ua avea e le Atua ma poto ia i tatou, ma le amiotonu, ma le faapaiaina, ma le faaolataga” (1 Korinito 1:30). E tatau ona fafauina polokalame faapitoa o koleniga faamisionare e lē gata e mo le sauniuniga o misionare galulue faasoloatoa, ae mo talavou laiti foi, ma tamaiti a’o’oga.

## **Auala, fuafuaga, ma galuega**

O lo tatou iloaina o loo tatou ola i se lalolagi saosaoa ma fesuisuia’i, e lē na o auala tuai e mafai ona tatou faalagolago i ai. O le mafuaaga lea e ao ai ona fuafua auala fou ma ese mai e ala i le poto sailia mai i le Atua. O auala faapena e aoga i le saili ina ia maua ai vaega eseese o tagata. E ese mai i auala, e aoga foi ona fafau ma faaoga sailiga faapitoa ma fuafuaga. O uso ma tuafafine ua faamanuiaina faapitoa i le malosi ma le poto e fuafua ai ma o loo i ai se vaai manino o mea moni o le taimi lenei ma mea e aoga ona fai, e ao ona latou auai i lenei galuega.

## **Atia’eina o auaunaga faapitoa**

O nisi o auaunaga e ao ona atia’eina o: soo se auaunaga mo tagata matitiva, auaunaga mo ē mama’i, auaunaga faa-talavou, ma auaunaga e ala i TV ma Leitio ma lomiga.

Afai e te manatunatu i le tusa ma le 3 piliona o tagata o le lalolagi o loo ola i le ititi ifo nai lo le 2 talā i le aso, e mafai ai ona e iloa le manaoga o le atia’eina o le fesoasoani tau meaai ma mea faapena. E ao ona a’oa’oina tagata ina ia iloa ola e ala i le galulue i o latou mafaufau ma o latou lima. O lenei galuega e aofia ai foi auaunaga faalea’oa’oga ma auauna a fafine/tina/teine. Ae peitai o ai o le a faatupeina nei

fuafuaga faale-fesoasoani? O le tamaoiga o agaga e ao ona tatou faalatalata atu i ai ma le agalelei faa-Kerisiano.

O le auala e maua ai vaega eseese o tagata e le'i o'o i ai le tala lelei, e tatau ona talepe i lalo le tele o manatu faailoga tagata ma tatalaina ai le tele o faitotoa. O le auaunaga fesoasoani i ē mama'i o le lima taumatau lea e mafai ona faia lenei galuega. O lenei, O le tino e aunoa ma se lima taumatau e laititi lava si galuega e mafai ona ia faia. O le mafuaaga lenei e ao ai ona atia'eina le galuega faafoma'i poo galuega fesoasoani i ē mama'i, ma aofia faapitoa ai lava tama ma teine talavou.

O talavou laiti a le ekalesia o se tofi sili lenei ona taua. O loo i ai i le lotolotoi o i latou nei le toatele o tagata talenia ma i ai meaalofa e manaomia ina ia iloa poo ai i latou nei ma faaogaina sa'o faalelei i le galuega. O le afa o le tausaga o tagata o le lalolagi o le 27.6 tausaga – o lona uiga o le afa o le fuaitau aofai o tagata o le lalolagi e laiti ifo nai lo lenei tausaga. O le laufanua tele lenei o le auaunaga faa-talavou.

Ae peitai o le mauaina o i latou e le'i faalogo lava e aoga foi le i ai o meafaigaluega: tusitusiga, tusi, pepa, ata ta'iala, videos, cds, dvds, leitio ma polokalame i TV, upega-o-mataaga (web-sites), ma mea uma faapena. O nei auala uma o faasalalauga e manaomia ina ia faia i gagana eseese, fuafuaina ina ia maua ai vaega eseese o tagata. O le galuega lenei e manaomia ina ia faia e auala eseese o faasalalauga ma lomiga, faaogaina ai tama ma teine talavou.

### **Fesoasoani tau tupe**

Ua fetalai mai le Alii ia i tatou: “Ia outou aumaia mea e sufulua'i mea i le fale e teu a'i oa, ina ia i ai mea e ai i Lo'u fale, ma ia outou tofotofo mai ia te A'u . . . pe o le a Ou lē tatalaina atu faamalama o le lagi, ma sasaa atu ia te outou le manuia, ina seia silisili ona tele” (Malaki 3:10). O tagata talitonu taitasi uma lava e ao ona latou toe fafo'iina atu ma le faamaoni i le Alii lana sefulua'i ma taulaga ofo. E tatau ona avea i tatou ma tagata faamaoni o loo umia faamanuiaga faaletino ua tatou maua, ma faasoaina nei faamanuiaga ma i latou o loo manaomia. O le a faapena, ona lē manaomia ina ia lafoaia galuega lelei ona o le leai o ni tupe.

### **Faavaveina o le o'o mai o le aso o le Alii**

O le tauaveina ma le faamaoni o le faatonuga a le Alii i le aapa atu ia i latou e le'i o'o atu i ai le tala lelei, o loo tatou faavaveina ai le o'o mai o le aso o le Atua. Ua fetalai mai nei Iesu ia i tatou taitasi uma lava: “Ia outou o . . . tala'i le tala lelei” . . . ia e faamalosi ma loto tele; aua e te fefe, aua foi e te fememea'i” . . . “Ou te ia te outou i aso uma, e o'o lava i le iuga o le lalolagi” (Mareko 16:15, Iosua 1:9, Mataio 28:20). Sauni e fai lau galuega ina ia aapa atu ia i latou e le'i faalogo pe afai e te naunau e vaai “i se motu o tagata e toatele . . . o malo uma, ma nuu, ma tagata, ma gagana . . . i luma o le nofoalii, ma luma o le Tama'i Mamoe, o oofu i ofu tatapuvae papa'e, ma laupama i o latou lima” (Faaaliga 7:9).

Ulua'i Aso , Tesema 10, 2006

# **O le Taamilosaga o le Faamanuiaga**

Tusia e A.Pow – Australia

**E**i ai le faaupuga tuai faapea “O le mea o loo fealua'i solo e o'o mai lava” O loo faailoa mai e le Tusi Paia leni lava manatu i tapulaa o loo mulimuli mai: “Ia foai atu, ma o le a foa'iina mai ia te outou . . . . . Auā o le fua e te fuaina atu o le a toe fuaina mai ia te outou.” “O le mea lava e luluina e le tagata, o

le mea foi lena o le a ia seleseleina.” “O le faamasinoga e te faamasino atu ai, o le a toe faamasinoina mai ai foi oe” (Luka 6:38; Kalatia 6:7; Mataio 7:2). O loo a’oa’o mai e le Tusi Paia ia i tatou o a lava uiga ma le ituaiga olaga tatou te ola ai ma poo a foi gaoiga tatou te faailoa atu o le a toe faafo’iina mai lava ia i tatou i se aso. O lenei tapulaa e mafai ona manatu i ai i se vaaiga lelei pe leaga foi. O faamanuiaga lelei ia o le a toe faafo’iina mai i lē o loo ola i se olaga lē faapito lea e tatau ona tatou mata’itu i ai i le taimi lenei. O le aposetolo o Paulo, o lona iloaina o lenei taamilosaga o le faamanuiaga, ua ia “apoapoa’i mai ia i tatou ina ia aua ne’i tatou faavaivai i amio lelei ma galuega lelei: auā o le a tatou seleseleina lava i taimi e tatau ai, pe afai tatou te lē faavaivai. A’o i ai la ia i tatou le avanoa, ia tatou agalelei ai i tagata uma lava” (Kalatia 6:9, 10). I nei fuaiupu o loo tatou maua ai ni mea taua o loo faaalua mai ai mo lo tatou manatunatuga. O le mea muamua lava e mafai ona tatou manatu i ai o le ave lea o avanoa ua tuuina mai i o tatou luma ma ave ma faamanuiaga e ala i le faia o galuega lelei mo isi. O loo ia faailoa mai foi ina ia aua ne’i tatou faavaivai i le saili ina ia faamanuiaina isi i galuega lelei.

### **O le a toe fo’i moni mai lava faamanuiaga**

O se fesili lelei e mafai ona fesiligia iinei o le fesili lea, aisea o le a vaivai ai se isi i le faamanuiaina o isi e ala i le faia o galuega lelei ia i latou? O se manatu i le tali o loo maua foi i le fuaiupu lava lea – “*auā o le taimi e tatau ai o le a tatou seleseleina ai.*” Ua faailoa mai e Paulo o le taamilosaga o le faamanuiaga e lē taliina mai i taimi uma i le taimi lava e maua ai e i latou o loo mauaina le manuia mai i o tatou lima. O le lagona faamalie loto i le fesoasoani i se isi e lē lagonaina i taimi uma; o le agaga fiafia o le faafetai e lē tuuina mai i taimi uma mo a tatou galuega. Ae ui i lea, e tatau ea ona ave lenei ma mafuaaga e faavaivai ai Kerisiano i le fesoasoani i se isi ona latou te lē mauaina le mamalu ma le viiga e patino ia i latou i le taimi lava lena? Ia alofa le Atua ia aua ne’i faapea; auā ana fuaina e lo tatou Faaola Lona ola faataulagafoina i le tali a tagata na Ia saili e faamanuia i le taimi lena, semanu ua matua tele lava Ana mafuaaga e faavaivai ai ma toe fo’i ai i le lagi. E lē o fai mai Paulo o le a lē o’o mai le tau i o le ave ma faamanuiaga i se isi, ae o loo ia faalototele mai ia i tatou ina ia tatou onosa’i mo lena tau, “auā o le taimi e tatau ai o le a tatou seleseleina ai.”

O lenei faatuai i le taamilosaga o le faamanuiaga na faaalua i le olaga o lo tatou Faaola, auā e itiiti lava faamanuiaga na toe fo’i mai ia te Ia. O le a la le mea na taofia mai ai o Ia mai i le faavaivai i le faia o mea lelei mo isi? O le fuaiupu o loo sosoo mai o loo faaalua ai le tali, “O le a Ia silasila i le tiga o lona finagalo, ma o le a faamalieina ai o Ia” (Isaia 53:11). Maitau le faalauteleina e le Agaga o Valoaga o lenei fuaiupu i se faamatalaga matagofie lava: “O le a le mea sa faatumauina ai le Alo o le Atua i Lona olaga o galuega faigata ma le faataulagafoina? Na Ia silasila i iuga o le tiga o Lona agaga ma sa faamalieina ai o Ia. O Lona silasila atu i le olaga e faavavau, na Ia silafia ai le fiafia o i latou na mauaina le faamagaloga ma le ola e faavavau ona o Lona faalumaina. Na Ia faalogo i le alaga a le au faaolaina. Na Ia faalogo i le au faaolaina o peseina le pese a Mose ma le Tama’i Mamoe.”<sup>1</sup>

O iinei ua faailoa mai ai ia i tatou le mea lilo o le onosa’i tumau i le olaga o le Kerisiano: o le FAATUATUA. O le faatuatua na silasila atu ai Iesu i tua atu o galuega faigata ma le tiga o lenei lagolagi, ma ati atu ai Lana silafaga i le mamalu o le a o’o mai. O le faatuatua na mafai ai ona Ia vaai i agaga o le a taliaina o Ia e ave ma o latou Faaola a’o agai atu pea le taimi ma o le a faaolaina e ala i Lona soifua. O le mafuaaga lenei na tuuina atu ai ia te Ia le malosi ina ia faaauau ai i galuega ma amioga lelei. O se mea moni lava lenei mo i tatou ina ia tatou manatunatu i ai, auā afai o loo tatou fuaina a tatou galuega e faatatau i i’uga lē tumau i lenei lalolagi, o lona uiga o le a vave ona tatou faanoanoa ma o le a tatou faavaivai ai loa i la tatou galuega. Ae afai e mafai ona tatou tepa faaitiiti a’e atili i luga o tatou mata ma vaai i le mamalu o le a o’o mai, ma vaai i le olioli i foliga o se agaga e lavea’iina mai nai le faafanoga, o le a mautinoa lava lo tatou maua o le malosi tatou te tumau ma onosai ai seia o’o i le i’uga.

“E mafai ona tatou maua se vaaiga o le lumana’i, le matagofie o le lagi. O loo faaalua mai i totonu o le Tusi Paia faaaliga e faatatau i le matagofie o le mamalu oi lumanai, o vaaiga o lo o fa’aataina mai e le aao o le Atua, ma o vaaiga nei e pele i Lana ekalesia. E mafai ona tatou tutu i tuaoi o le aai e faavavau e

ala i le faatuatua ma faalogo ma lagona atu upu alofa o faafetaia'i mai ai i latou o loo galulue faatasi ma Keriso i lenei olaga, ma manatu o se mamalu taua lo latou puapuagatia mo Ia . . .

“O iina e faafeiloa'ia ai e le au faaolaina i latou na ta'ita'ia i latou i le Faaola, ma au faatasi ai le au paia uma i viiga o Ia na maliu ina ia maua e tagata le ola e tutusa ma le ola o le Atua.”<sup>2</sup>

Oka! Pe ana osofia i tatou e nei manatunatuga ina ia tatou o ma saili i nisi e mafai ona tatou faamanuiaina, saili nisi e mafai ona tatou fesoasoani i ai, saili nisi e mafai ona tatou faamalosi i ai e ui lava ina foliga mai e lē o toe faafo'i vaveina mai le faamanuiaga. “O le tele o le lelei e faapena ona faataunuaina o le a lē iloa lava e le lalolagi, ae o i'uga faamanuiaina o le a vaaia i le faamanuiaga tele o le olaga faavavau o le a sau.”<sup>3</sup>

O agaga taitasi uma lava o le a faaolaina mai i lenei lalolagi agasala o le a tumau e faavavau o ni fetu i luga o palealii o i latou na galulue mo lo latou faaolataga. “O i latou foi e popoto o le a susulu e faapei o le pupula o le vanimonimo; o i latou foi e faaliliuina tagata e toatele i le amiotonu e faapei o fetu e faavavau faavavau lava” (Tanielu 12:3).

“O i latou ua latou tofo i le suamalie o le alofa na toe faatauina mai ai i latou, o le a latou lē malolo, ma o le a lē mafai foi ona latou malolo seivagana ua malamalama i latou uma lava o loo latou fesoota'i i ai i le fuafuaga o le faaolataga. E tatau ona ē fesili faapea, ‘Le Alii e, o le a se mea e te finagalo ou te faia? E faapefea ona ou faamamaluina ma viia Lou suafa i luga o le fogaelele?’ O loo fano agaga i o tatou itu uma; o le a le mea o loo ē faia ina ia manumaloina mai ai i latou ia Keriso? Maimau e, pe ana outou faaogaina o outou malosi o le mafaufau ia saili ai ina ia faalatalata atu i tagata agasala ina ia ē manumaloina mai ai, e tusa lava pe tasi le tagata i le ala o le amiotonu! Se manatu ina a taua! O se agaga e toatasi e vivii i le Atua i le olaga atoa e faavavau! O se agaga e toatasi e olioli i le fiafia ma le ola e faavavau! O se ma'a taua e tasi e susulu e faavavau faavavau lava! Ae e mafai ona sili atu nai lo le tasi le agaga e mafai ona manumaloina mai nai le agasala i le faapaiaina, ma o le tau e matua tamaoiga lava i le malo o le Lagi. Fai mai le fetalaiga a le Alii e ala mai i le perofeta, ‘O ē e faaliliuina le toatele i le amiotonu o le a susulu e faapei o fetu e faavavau faavavau lava.’”<sup>4</sup>

E lē faagaloina lava e le Atua le tagata o loo galue ma le onosai mo agaga, ae Na te faatumauina e faavavau a latou galuega e avea ma fetu i luga o o latou palealii.

## O le faamanuiaga o le alofa

O le vaega e tasi e manaomia ina ia manatunatu i ai e faatatau i le taamilosaga o le faamanuiaga o le mafuaaga lea o loo osofia ai i tatou i a tatou galuega. E tatau ea ona taula'i a tatou faufauga i le faia o mea lelei mo isi ina ia maua ai se tau'i mo a tatou taumafaiga? O le a se mea e ao ona una'iina ai le Kerisiano ina ia avea o ia ma faamanuiaga i isi ma ia foa'i fua atu a latou mea uma? E tatau lava ona tatou vaavaai i le Atua ina ia maua ai le tali. Fai mai le faamaumauga a le Tusi Paia “ua faapea lava ona **alofa** le Atua i le lalolagi, o lea ua Ia **foa'i** mai ai Lona Alo e toatasi” (Ioane 3:16). O le mafuaaga lea na mafua ai ona osofia le finagalo o le Atua ina ia foai mai le faamanuiaga silisili lava ua faapea ona foa'iina mai i le aiga tagata: o le **alofa**, o le **alofa mamā** ma le **lē faapito**. Na Ia silafia o le a teena e le toatele Lana meaalofa i tagata ma o le a fasiotia Iesu e i latou tonu lava ia sa fai mai latou te ava ia te Ia. Ae na matuā loloto lava le alofa o le Tamā ma na matua mausali lava le mafuaaga o Lana fuafuaga e ui lava ina teena ae na Ia filifili lava e foa'i mai. O lenei lava mafuaaga e tasi o le alofa lē faapito sa nofo i totonu o le loto o Keriso ina ua Ia tuuina atu Lona ola i luga o Kalevario. “E lē sili lava le alofa o se tasi nai lo lenei, ina ia tuuina atu e se tasi lona ola mo Ana uo” (Ioane 15:13). O le alofa e ao ona una'iina ai i tatou ina ia tatou fesoasoani i isi; o le alofa lea e tatau ona avea ai i tatou ma faamanuiaga i totonu o lenei lalolagi. E lē tatau ona i ai se mea e sili a'e pe ititi ifo foi nai lo le alofa lē faapito ina ia osofia ai i tatou. Ua faatonuina i tatou, “Ia ia te outou foi lea lava **mafaufau (mind)** sa ia Keriso Iesu” (Filipi 2:5). O le faamatalaga o loo mulimuli mai e tauaofa'iina ai i se tulaga matagofie lava:

“O tagata taitasi uma lava o le autu lea o le alofa naunau o Ia na foa’iina mai Lona ola ina ia mafai ai ona Ia toe aumaia tagata i le Atua. O tagata e agasala ma leai se fesoasoani, o loo tuuina atu ina ia faaumatiaina e mailei a Satani, o loo tausia e faapei ona leoleo o le leoleo mamoe mo mamoe o lana lafu.

“O le faata’ita’iga a le Faaola e ao ona avea ma tapulaa o le tatou auaunaga mo i latou o loo faaosoosoina ma i latou o loo sese. O le naunau ma le alofa mutimutivale ma le faapalepale lava lea e tasi na Ia faaalua ia i tatou, e ao foi ona tatou faaalua i isi. Ua Ia fetalai mai, ‘E faapei ona ou alofa atu ia te outou, ia faapea foi ona outou alofa le tasi i le tasi’ (Ioane 13:34). Afai e afio Keriso i totonu ia i tatou, o le a tatou faaalua foi Lona alofa lē faapito i tagata uma lava tatou te fesoota’i. A’o tatou vaai atu i tane ma fafine o loo manaomia le alofa ma le fesoasoani, o le a tatou lē fesili ifo faapea, ‘e tatau ea le fesoasoani mo i latou?’ ae e ao ona tatou fesili faapea, ‘e faapefea ona mafai ona ou fesoasoani ina ia faamanuiaina i latou?’”<sup>5</sup>

Afai tatou te naunau ina ia avea i tatou ma so’o moni lava o Keriso ma faaauau le galuega tele i le faamanuiaina o le aiga tagata, e manaomia la ina ia faatumuina i tatou i se alofa mo agaga. O le alofa lē faapito lenei mo agaga o le a iloa ai so’o moni o Keriso. Fai mai Iesu, “Ua Ou tuu atu ia te outou se poloaiga fou, ina ia outou alofa le tasi i le tasi, e faapei ona Ou alofa atu ia te outou, ina ia faapena foi ona outou alofa le tasi i le tasi. O lenei alofa o le a iloa ai e tagata uma o outou o o’u soo, pe afai tou te alofa le tasi i le tasi” (Ioane 13:34, 35). Maimau e, pe ana tatou faapei o Iesu; maimau e, pe ana avea i tatou ma Kerisiano. “Ua foa’iina mai ia i tatou o tatou mafaufau; ae peitai o a tatou amio tatou te faia e i tatou lava; o iuga ia o olaga o loo tatou ola ai, ma manatunatuga ma tapulaa o loo tatou teufatuina. A tatou vaai i tagata e matuā mausali lava i tapulaa, e faamaoni i le faatinoina o tiute, ma vilivilita’i i le galuega a le Atua, ae e agamalu, alofa, ma onosai i tagata uma, e sauni e faamagalalo, ma faaalua le alofa mo agaga na maliu ai Keriso, e lē manaomia ina ia tatou fesili faapea, O i latou ea o ni Kerisiano?”<sup>6</sup>

## O faamanuiaiga lē leoa

O le isi itu taua i le taamilosaga o le faamanuiaiga o le olaga o le itu lenei, e tatau ea ona vave faailoa atu e Kerisiano a latou galuega mo isi pe tatau ea ona latou finafinau ma le gugū i le latou auaunaga mo agaga? “Ia outou ne’i avatu a outou meaalofa i luma o tagata, ina ia iloa ai e i latou: ne’i leai so outou tau mai i lo outou Tama oi le lagi. O le mea lea, a ē avatu au meaalofa, aua e te ilia le pu i ou luma, e faapei ona faia e tagata pepelo i sunako ma ala tele, ina ia maua ai so latou viiga mai i tagata. E moni ou te fai atu ia te outou, ua latou maua lo latou tau. Ae peitai a ē avatu ni au meaalofa, aua ne’i iloa e lou lima tauagavale le mea e faia e lou lima taumatau: ina ia lilo au meaalofa: o lou Tamā foi o Lē silasila i le mea lilo, o Ia lava o le a tauia faaaliali mai ia te oe” (Mataio 6:1-4). Maitau le faalateleina o lenei tapulaa e le Agaga o Valoaga i le fesootaiga ma le olaga o lo tatou Faaola: “E leai se faale-tagata na fefiloi faatasi ma Lona olaga. O le viiga lea e avatu e le lalolagi i tulaga o tofiga, tamaoiga, poo taleni foi na matuā lē maua lava i le Atalii o le tagata. E le’i faaaogaina lava e Iesu se tasi o auala ia sa faaaogaina e tagata ina ia maua mai ai le faaloalo ma le viiga. O le tele o seneturi a’o Ia le’i fanau mai na valoia ai faapea e faatatau ia te Ia, ‘O le a lē alaga o Ia, o le a lē leo tele foi o Ia, o le a lē faalogoia foi Lona leo i le ala’ (Isaia 42:2) . . .

“Na sailia e Faresaio le ese mai o i latou e ala i a latou sauniga faia ma le faautauta ma le faalialiavale i a latou tapuaiga ma a latou meaalofa . . .

“Sa matuā eseese lava nei mea uma lava ma le olaga o Iesu. E le’i i ai se finauga leoleoā i lenā olaga, e le’i i ai se tapuaiga faalialia, e le’i i ai ma se gaioiga na molimauina ina ia maua ai se viiga. Sa natia Keriso i totonu o le Atua, ma sa faaalua le Atua i le olaga o Lona Alo. O le faaalua lenei sa naunau Iesu ina ia taula’i i ai mafaufau o tagata.”<sup>7</sup>

O i ai ea ni soo moni o Keriso i totonu o le ekalesia i le aso lenei? A’o ē faitauina lenei tusitusiga e faatatau i le olaga o Keriso, fesili ifo nei ia te oe lava, o lo’u olaga ea lenei? Ua ou avea ea mo a’u le olaga o Keriso? Ua ou gaua’i atoatoa ea? Ua natia ea lo’u olaga i totonu ia Keriso? O avea ea lo’u olaga o se faamanuiaiga i se tasi? Afai o le tali o le **leai** i so’o se fesili o nei fesili, o lona uiga o le taimi lenei mo i tatou e tatau ai ona suia i tatou, o le taimi lenei mo i tatou tatou te la’a ai i luma i le faatuatua, o le taimi

lenei tatou te oti ai ia i tatou lava, o le taimi lenei e tatau ai ona avea i tatou ma Kerisiano, o le taimi lenei e tatau ai ona tatou ola. Ina ua faaalua e le Alii i le aposetolo o Paulo e na te lē o ola i le olaga sa tatau ona ia ola ai, ma sa ia fai taua i le malō o le Atua a ua lē o le auauna mo lea malō, na ia faia loa le laasaga, sa ia faia le filifiliga ina ia suia o ia ma tuuina atu atoatoa loa o ia iā Keriso e aunoa ma le toe taofia mai o se mea lava e tasi mai ia te Ia. Ua ia fai mai, “Ua faasatauroina faatasi i ma’ua ma Keriso: e ui i lea ou te ola; ae e lē o a’u, a’o Keriso o loo ola i totonu ia te a’u” (Kalatia 2:20).

### **O le faia i le taimi lenei poo le leai lava**

I le faamasinoga tele e tasi lava le fesili o le a lē fesiligiaina lava ia i tatou e faatatau i lo tatou olaga faa-Kerisiano, ma e ala i le faailoga lava lea e tasi, o le a tasi ai foi le fesili o le a fesiligia ai i tatou.

Maitau mai lenei faaupuga malosi lava mai i le Agaga o Valoaga:

“E toatele o loo faaalua le faatalalē ia i latou ua lafoina atu e le Atua i lo latou lotolotoi mo le sini o le tofotofoina ma le a’oa’iina ai o i latou, ma ia faaalua ai mea o loo i o latou loto. E faitau e le Atua. Na te faailogaina gaioiga taitasi uma lava o le loto faapito, o gaioiga uma lava o le lē agalelei i ē o loo puapuagatia, o fafine ua oti a latou tane, ma ē ua matua oti; ma Na te tusia i tafatafa o o latou igoa upu ia, *Agasala, māmāsagia, tagata soli-tulafono*. O le a tauia i tatou e tusa ma a tatou galuega. Soo se faatalalē lava i tiute i ē matitiva ma puapuagatia o se faatalalē foi lea i tiute ia Keriso i tino o Lana au paia.

“A iloilo ina loa olaga o tagata uma i luma o le Atua, e lē fesiligiaina lava le fesili lea, O a mea sa ia te i latou? Ae o le fesili o le a fesiligia, O a mea sa latou faia? O i latou ea o ni tagata e **faatinoia** le **upu**? Sa latou ola ea mo i latou lava? Pe sa latou galulue ea i galuega o le alofa, i galuega o le agalelei, i le alofa, ma faasiliina isi nai lo i latou, ma faafitia i latou lava ina ia mafai ai ona latou faamanuia atu i isi? Afai e faailoa mai e faamaumauga o olaga ia sa latou ola ai, o loo iloga a latou amio i le agalelei, faafitia e i latou o i latou lava, ma le loto foa’i, o le a latou maua le mautinoaga ma le faamanuiaga mai ia Keriso, ‘Le Auauna lelei e,’ O mai ia, outou ua faamanuiaina e lo’u Tama, ia fai mo outou le malo na saunia mo outou talu ona faavaeina le lalolagi.’”<sup>8</sup>

Afai tatou te fia faalogo i upu o le faamanuiaga o sau mai i laufofoga o Keriso, e manaomia la ina ia avea i tatou ma faamanuiaga i le taimi lenei! O le Alii lava Ia ua ole mai nei i loto taitasi uma lava i upu mai i Lona lava siufofoga, “Na ou faalogo i le siufofoga o le Alii, o faapea mai, O ai o le a Ou auina atu, o ai foi o le a alu atu mo i tatou? Ona ou faapea atu ai lea, O a’u lenei; auina atu a’u” (Isaia 6:8). O taeao atonu ua tuai tele lea mo i tatou. “O le mea lea, (e faapei ona fetalai mai o le Agaga Paia, o le aso lenei afai o le a outou faalogo ai i Lona siufofoga, aua tou te faama’a’a i o outou loto)” (Eperu 3:7, 8). O le aso lenei, o le aso lea o le faaolataga, o le aso lenei, o le aso lea e tatau ai ona tatou faapea ifo, “O a’u lenei, auina atu a’u.” O le aso lenei, le au uso e, ma tuafafine, o le aso lea e tatau ona ola ai, o le aso lea e tatau ona ola ai i le olaga o faamanuiaga! Amene.

### ***Sitaga***

<sup>1</sup> *The Acts of the Apostles*, p. 601.

<sup>2</sup> *Ibid.*, pp. 601, 602.

<sup>3</sup> *The Ministry of Healing*, p. 154.

<sup>4</sup> *The Signs of the Times*, May 1, 1884.

<sup>5</sup> *The Ministry of Healing*, p. 162.

<sup>6</sup> *The Signs of the Times*, July 14, 1887.

<sup>7</sup> *The Ministry of Healing*, pp. 31, 32.

<sup>8</sup> *The Review and Herald*, July 13, 1886.